



Íhugun um líf andans

Ruhi stofnunin



Bók 1

Íhugun um líf andans

Ruhi stofnunin

Bækur í námskeiðaröðinni:

Hér fyrir neðan er listi yfir núverandi heiti námskeiðsbókanna sem Ruhi stofnunin hefur hannað. Bækurnar eru hugsaðar sem aðalnámskeiðaröð í kerfisbundinni viðleitni til að auka hæfni ungmenna og fullorðinna til að þjóna samfélagi sínu. Ruhi stofnunin er einnig að þróa námskeið sem greinast út frá bók 3 í aðalnámskeiðaröðinni, í því skyni að þjálfar bahá'í barnakennara, sem og námskeið sem greinast út frá bók 5 sem þjálfar hvetjara til að vinna með unglingahópa. Þær bækur eru einnig gefnar upp í listanum hér fyrir neðan. Vert er að taka fram að listinn mun taka breytingum eftir því sem reynsla á vettvangi þróast og nýjar námskeiðsbækur munu bætast við eftir því sem námskeið sem eru í þróun ná því stigi að vera tilbúin fyrir almenna dreifingu.

Bók 1	<i>Íhugun um líf andans</i>
Bók 2	<i>Lagt á braut þjónustu</i>
Bók 3	<i>Barnakennsla, fyrsta stig</i> <i>Barnakennsla, annað stig (hliðargrein)</i> <i>Barnakennsla, þriðja stig (hliðargrein)</i> <i>Barnakennsla, fjórða stig (hliðargrein)</i>
Bók 4	<i>Tvenndarbirtingin</i>
Bók 5	<i>Kraftar unglinga leystir úr læðingi</i> <i>Frumhvötin til athafna: Fyrsta hliðargrein bókar 5</i> <i>Víkkandi hringur: Önnur hliðargrein bókar 5</i>
Bók 6	<i>Að kenna málstaðinn</i>
Bók 7	<i>Samstíga á þjónustubraut</i>
Bók 8	<i>Sáttmáli Bahá'u'lláh</i>
Bók 9	<i>Frá sjónarhóli sögunnar</i>
Bók 10	<i>Að skapa þróttmikil samfélög</i>
Bók 11	<i>Efnisleg verðmæti</i>
Bók 12	<i>Fjölskyldan og samfélagið</i>
Bók 13	<i>Þátttaka í samfélagsaðgerðum</i>
Bók 14	(væntanleg)

Höfundarréttur © 2000 Ruhi stofnunin, Kólumbíu
Öll réttindi áskilin. Útgáfa 4.1.4.PE birt árið 2023
Prentuð á Íslandi

Upprunalega gefin út á spænsku undir heitinu *Reflexiones sobre la vida del espíritu*
Höfundarréttur © 1987, 1995, 2008, 2020 Ruhi stofnunin, Kólumbíu
ISBN 978-958-59880-3-3

Ruhi stofnunin hefur gefið Andlegu þjóðarráði bahá'ía á Íslandi leyfi til að prenta takmarkað upplag af þessari bók á íslensku.

Ruhi stofnunin
Cali, Kólumbíu
Netfang: instituto@ruhi.org
Veffang: www.ruhi.org

Andlegt þjóðarráð bahá'ía á Íslandi
Kletthálsi 1, 110 Reykjavík
567-0344
bahai@bahai.is
www.bahai.is

Efnisyfirlit

Til umhugsunar fyrir leiðbeinandann	v
Að skilja bahá'í ritin	1
Bænir	13
Líf og dauði	29

Til umhugsunar fyrir leiðbeinandann

Undanfarin mörg ár hefur þeim svæðum verið að fjölga þar sem stundað er nám í fyrstu bókinni í námskeiðaröð Ruhi stofnunarinnar, *Íhugun um líf andans*. Í langflestum tilvikum er námsefnið rætt og ígrundað í hópi vina sem mynda námshring sem kemur reglulega saman yfir ákveðið tímabil, tekur námskeiðið á nokkrum dögum í öflugri námslotu eða kemur saman í sumarbúðum eða skólafríum. Hvert sem tilefnið er gegnir einn meðlimur hópsins hlutverki leiðbeinanda. Samband leiðbeinanda og annarra þátttakenda ber ekki svip af sambandi kennara og nemenda heldur taka allir samviskusamlega þátt í lærdómsferlinu. Leiðbeinandinn er heldur ekki óháður fundarstjóri sem einungis stýrir umræðum. Þegar hann eða hún hefur lokið tilteknum fjölda námskeiða í námskeiðaröðinni og unnið þá þjónustu sem þau hvetja til, hefur viðkomandi öðlast færni til að aðstoða hvern og einn í hópnum til að vinna að markmiðum námsefnisins. Gagnlegt gæti verið fyrir leiðbeinendur í bók 1 að fara öðru hvoru yfir þær hugmyndir sem hér eru kynntar.

Í þessu fyrsta námskeiði eru þátttakendur af ólíkum bakgrunni um heim allan. Sumir þeirra eru bahá'íar sem vonast til að geta aukið hæfni sína til að þjóna málstaðnum. Aðrir sjá námskeiðið sem fyrsta skrefið í könnun á bahá'í trúnni. Enn aðrir laðast að bahá'í hugsjónum og vilja kynna sér markmið og viðleitni samfélagsins. Vaxandi fjöldi ungs fólks vill auka hæfni sína til að þjóna þjóðfélaginu, iðulega með því að taka þátt í einhverri áætlun bahá'í samfélagsins, og lítur á námskeiðið sem fyrsta skrefið í þá átt.

Öllum þátttakendum ætti frá upphafi að vera ljóst að með námskeiðum Ruhi stofnunarinnar er lagt á braut þjónustu við mannkynið. Þessa braut gengur hver og einn á sínum eigin hraða, fær við það aðstoð og aðstoðar aðra. Að feta þessa þjónustubraut felur í sér leit að tvíþættum siðferðilegum tilgangi sem felst í að sinna sínum eigin andlega og vitsmunalega vexti og stuðla að umbreytingu samfélagsins. Framfarir á þessari braut fela í sér aukinn skilning og þekkingu á mörgum sviðum, þróun andlegra eiginleika og lofsverðra viðhorfa auk ýmiss konar hæfileika og færni. Þær heimildir og sú þekking sem bækur stofnunarinnar byggja á eru annars vegar kenningar bahá'í trúarinnar og hins vegar uppsöfnuð reynsla bahá'í heimssamfélagsins af eflingu efnislegrar og andlegrar siðmenningar. Hvatinn að baki bókunum er sýn Bahá'u'lláh á hvernig við getum vaxið sem einstaklingar og á siðmenninguna sem við getum byggt upp. Gert er ráð fyrir að allir þátttakendur, án tillits til bakgrunns, séu opnir fyrir þessari sýn sem kemur skýrt fram í öllum bókum stofnunarinnar.

Í heimi þar sem trúfélög og hugmyndafræði af ýmsum toga beita öllum tiltækum ráðum til að afla sér fylgjenda, gæti einhver sem ekki þekkir til trúarinnar spurt hreinskilinna spurninga um áform Ruhi stofnunarinnar, og þá sérstaklega: „Er verið að biðja mig um að skipta um trú?“ eða „Er ég beðin(n) um að taka trú?“ Slíkar spurningar gefa leiðbeinanda tækifæri til að útskýra tilgang námskeiðanna eins og lýst er hér að ofan. Þótt eðlilegt sé að bahá'íar vilji sjá vini sína ganga bahá'í trúnni á hönd, banna kenningar trúarinnar predikun á trúnni og á það getur leiðbeinandinn bent. Að ganga þjónustubrautina sem námskeiðin opna þátttakendum kallar á sífellt dýpri skilning á kenningum Bahá'u'lláh eins og námsefnið gefur ótvírætt til kynna. Trú

og viðurkenning eru mál sem hver og einn getur ígrundað frjálst og án utanaðkomandi þrýstings.

Ekki kemur á óvart að spurningin um skilning, sem er meginefni allra bóka í námskeiðaröðinni, skuli vera sú fyrsta sem fjallað er um í þessari bók. Að lesa helgiritin á ekkert sammerkt við lestur þeirra þúsunda blaðsíðna sem fyrir augu okkar ber á lífsleiðinni. Bókarhlutinn, „Að skilja bahá’í ritin“, leitast við að rækta þá venju að lesa kafla í hinum helga texta á hverjum degi og hugleiða merkingu hans. Þetta er venja sem kemur þátttakendum að verulegu gagni þegar þeir fara inn á braut þjónustu. Til að leiðbeina þeim í náminu verður leiðbeinandinn að gefa náninn gaum að hugtakinu skilningur.

Bahá’í ritin innihalda djúpstæð andleg sannindi. Jafnvel þegar við leitumst við að auka skilning okkar á óþrotlegri merkingu þeirra er ljóst að við munum aldrei komast á leiðarenda. Við fáum yfirleitt grunnskilning á merkingu helgigreinar þegar við lesum hana í fyrsta sinn og þetta er einmitt upphafspema þessa fyrsta bókarhluta. Eftir að hafa lesið tilvitnunina „Hægt er að bæta heiminn með hreinum og góðum gerðum, með lofsverðu og sæmandi framferði“ eru þátttakendur einfaldlega spurðir: „Hvernig er hægt að bæta heiminn?“ Í fljótu bragði gætu flestar spurningar og æfingar af þessu tagi þótt ívið of einfaldar. En margra ára reynsla virðist réttlæta þá ákvörðun stofnunarinnar að byrja með þessum hætti. Það þarf að minna okkur öll á að þótt við viljum finna fljótt ýmsa fleti sannleikans í einhverri tiltekinni helgigrein ættum við ekki að horfa fram hjá augljósri merkingu hennar. Að beina athyglinni að þessu fyrsta stigi í skilningi okkar er mjög mikilvægt fyrir hópamráð, það styrkir einingu í hugsun, einingu sem auðvelt er að ná fram þegar guðleg viska fær að upplýsa persónulegar skoðanir.

Hér er mikilvægt að hafa í huga að skilningur á dýpri merkingu flestra helgigreina fæst tæpast með langri umræðu um einstök orð sem tekin eru úr samhengi. Stundum gæti reynst nauðsynlegt að hópurinn fletti upp í orðabók. Það sem gæti reynst gagnlegra fyrir þátttakendurna er að læra hvernig ráða má merkingu orða af samhengi þeirra í heilum setningum og efnisgreinum.

Dæmi sem sýna hvernig hugmyndir verða ljósar og auðskildar geta verið gagnleg til að skilningur fái á öðru og meira en þröngri merkingu þeirra. Það sem kallað er eftir í þessum efnum eru beinar æfingar. Í 2. kafla eru þátttakendur til dæmis beðnir um að ákveða í ljósi þess sem þeir hafa nýlega lesið hvort viss einkenni séu lofsverð. Í svipaðri æfingu í 4. kafla eru þeir hvattir til að nefna fimm dyggðir og ákveða síðan hvort hægt sé að tileinka sér þær án þess að vera sannsögull – en sannsögull er lýst í ritunum sem „grundvelli allra mannlegra dyggða“.

Til þess að markmið þessa bókahluta náist er stefnt að auknum skilningi með því að hvetja þátttakendur til að íhuga þýðingu helgigreinanna sem kynntar eru. Í 2. kafla eru þeir beðnir að ákveða hvort eftirfarandi staðhæfing sé sönn: „Það er svo fátt gott fólk í heiminum að gerðir þess breyta engu.“ Hér er ekki ætlunin að fá aðeins fram persónulega skoðun á málinu. Leiðbeinandinn verður að staldra við og spyrja þátttakendur um ástæðuna fyrir svörum þeirra. Niðurstaðan sem hópurinn ætti að komast að er að fullyrðingin hljóti að vera ósönn vegna þess að hún stangast á við fyrstu tilvitnunina í kaflanum á undan. Spurningin um hvort bahá’íi megi játa syndir sínar fyrir öðrum er líka dæmi um þessa tegund æfinga. Vísað er til banns við syndajátningu sem leið til aflausnar í kenningum trúarinnar en slíkar játningar eru ekki nefndar sérstaklega í neinum af undanfarandi köflum. Hægt er að ná fram skilningi á þessu með því að ígrunda merkingu helgiorðanna: „Statt sjálfum þér reikningsskap á hverjum degi áður en þú verður krafinn skilagreinar.“

Æfingarnar í þessum hluta reyna á engan hátt að gera öllum merkingarblæbrigðum efnisgreinanna skil. Ein spurning sem allir leiðbeinendur verða að velta fyrir sér er hve miklum tíma skuli varið í umræður um hverja æfingu. Mikilvægt er að hafa í huga að langar umræður um hugmyndir sem eru lítt tengdar efninu hafa tilhneigingu til að draga úr virkni námsins. Sérhver hópur ætti að tileinka sér skynsamlega framvindu námsins og þátttakendur ættu að fá það á tilfinninguna að þeim fari stöðugt fram í samræmi við sína eigin getu. Leiðbeinandinn verður þó að vera athugull og gæta þess að ekki sé farið fljótt og yfirborðslega yfir efnið án þess að hugað sé að greiningu á æfingunum. Hópar sem hafa þann háttinn á og fylla einungis í eyður hafa aldrei náð varanlegum árangri.

Minnast þarf á eitt lokaatriði: Það er leiðbeinandans að tryggja að sérhver meðlimur hópsins taki þátt í lærdómsferlinu sem efnið býður upp á. Oft er áskorunin sú að fá almenna þátttöku án þess að þrýst sé á að einhverjir tali. Ljóst ætti að vera að þessari áskorun er sjaldan mætt með því að spyrja spurninga á borð við „Hvað þýðir þetta fyrir þig?“ Spurningar af þessu tagi hafa tilhneigingu til að gera þekkingu og sannleika að ígildi persónulegra skoðana. Og þá reynist erfitt að skapa andrúmsloft þar sem samráð þátttakendanna stuðlar í raun að auknum skilningi.

Annar hluti bókarinnar fjallar líkt og sá fyrsti um venju sem er bráðnauðsynleg andlegu lífi: að fara reglulega með bænir. Upphafskaflinn skýrir hugtakið „þjónustubraut“ og það tvíþætta markmið sem við setjum okkur til að ganga þessa braut. Þátttakendur skoða fyrst tilvitnanir sem veita innsýn í eðli þessa markmiðs, en þetta þema verður útfært á síðari námskeiðum.

Það er í þessu ljósi sem fjallað er um mikilvægi bænarinnar í öðrum hluta. Nálgunin er svipuð þeirri sem lýst er í undanfarandi efnisgreinum. Spurningar og æfingar eru mótaðar til að auka skilning á merkingu þeirra kafla í ritunum sem eru til ígrundunar. Þegar hópurinn heldur áfram gæti komið til þess að leiðbeinandinn þurfi að eyða vafa og greina hugmyndir sem eiga rætur í túlkunum og venjum fortíðar. Í sumum trúarhefðum hafa form og helgisiðir smám saman skyggt á mikilvægi innra hugarfars og margir virða að vettugi nauðsyn þess að biðja, sem fyrir mannssálina skiptir ekki síður sköpum en fæðan fyrir líkamann.

Umfram allt er í þessum hluta stefnt að því að vekja með þátttakendum löngun til að „tala við Guð“ og nálgast hann. Meðal hugmynda sem fjallað er um er þýðing þess að vera í bænarástandi, afstaða hjarta og huga þegar við biðjum og aðstæður sem skapa ætti í umhverfi okkar, hvort sem við erum ein eða með öðrum. Reyndar eru þátttakendur beðnir að íhuga að hefja bæna- og helgistundahald eftir að hafa hugleitt þau öfl sem myndast með sameiginlegri tilbeiðslu.

Vonast er til að námið í þriðja hluta bókarinnar, „Líf og dauði“, muni styrkja þann ásetning að halda inn á þjónustubrautina og miðla henni dýpri merkingu. Þjónusta í þessum heimi verður best skilin í heildarsamhengi lífsins sem heldur áfram að eilífu eftir þessa jarðnesku tilvist þegar sálir okkar þroskast í heimum Guðs. Í námsferli, öndvert við tækniþjálfun, eiga þátttakendur að verða sér stöðugt meðvitaðri um merkingu og mikilvægi þess sem þeir eru að gera. Reynslan bendir til þess að aðeins þegar slík meðvitund eykst muni þeir líta á sig sem virka og ábyrga „eigendur“ síns eigin náms.

Hver kafli þessa hluta hefst með einni til þremur tilvitnunum í bahá'í ritin og síðan koma nokkrar æfingar. Orðfæri helgigreinnanna sem vitnað er til í þessum hluta er meira krefjandi en í þeim sem fóru á undan. Þess gerist auðvitað engin þörf að hópurinn staldri við

erfið orð. Það er leiðbeinandans að tryggja að allir skilji meginhugmyndina sem fjallað er um í hverjum kafla og er einmitt það sem æfingarnar reyna að skýra.

Miðað við eðli viðfangsefnisins eru fáar æfingar sem fela í sér áþreifanleg dæmi og flestar þeirra eru á hugmyndastigi. Tekið skal fram að sumum spurningum í þessum æfingum er ekki hægt að svara fljótt eða með skýrum hætti. Tilgangur þeirra er að vekja athygli á viðfangsefninu. Það eitt að þátttakendur hugleiði þessar spurningar fullnægir markmiðum námsins.

Í nokkrum af fyrstu köflunum er lögð áhersla á samband sálar og líkama sem í sameiningu mynda manninn á þessu tilverustigi. Meginhugmyndin sem kynnt er í þessum köflum er sú að sálin er ekki líkamleg – tengslum hennar við líkamann má líkja við ljósið sem birtist í spegli. Hvorki rykið á speglinum né hugsanleg eyðilegging hans hefur áhrif á birtu ljóssins. Dauðinn er einungis sú breyting á ástandi sem verður þegar tengsl líkama og sálar rofna. Eftir það heldur sálin áfram að eilífu áleiðis að skapara sínum.

Því næst er fjallað um spurninguna um tilgang lífsins – að þekkja Guð og komast í návist hans. Umræðan hér snýst um tvö viðtæk þemu. Hið fyrra er tilgangurinn með lífi okkar í þessum heimi, og hið síðara vegferð sálarinnar eftir dauðann. Sálin er tákn Guðs og getur endurspeglað öll nöfn hans og eigindir. Samt er hæfnin innra með manninum dulin og hún verður aðeins þróuð með atbeina opinberenda Guðs, þeim heilögu einstaklingum sem sendir eru öðru hvoru til að leiðbeina mannkyninu. Fyrir atbeina þeirrar andlegu menntunar sem þeir veita geta fjársjóðirnir sem dyljast innra með okkur komið í ljós.

Hvað varðar vegferð sálarinnar eftir dauðann eru settar fram nokkrar hugmyndir til íhugunar fyrir þátttakendur, þ.e. að þeir sem sýna Guði hollustu geta öðlast sanna hamingju; að ekkert okkar getur nokkru sinni séð fyrir sín eigin endalok og þess vegna ættum við að fyrirgefa hvert öðru og ekki telja að við séum yfir aðra hafin; að í næsta heimi, líkt og í þessum, mun sálin halda áfram að þroskast og andlegu skynvitin sem við þróuðum hér á jörðinni koma að gagni þar; að við hittum ástvini okkar í ríkjunum hið efra, munum eftir lífi okkar í þessum heimi og njótum félagsskapar við heilagar sálir.

Hlutanum lýkur með tilvitnun úr ritum Bahá'u'lláh þar sem við erum fullvissuð um blessun næsta heims og hvött til að leyfa ekki breytingum og umskiptum þessa lífs að hryggja okkur. Þátttakendur eru loks beðnir um að hugleiða þýðingu þess sem þeir hafa lært í náminu fyrir þeirra eigið líf.



Að skilja bahá'í ritin

Tilgangur

Að styrkja þá venju að lesa kafla
úr helgiritunum á hverjum degi
og hugleiða merkingu þeirra.

1. KAFLI

Tilgangur þessa bókarhluta er að hjálpa þér að þroska og styrkja þá venju að lesa kafla úr helgiritunum á hverjum degi og hugleiða merkingu þeirra. Bókarhlutinn hefst á einfaldri æfingu þar sem þú ert beðin(n) að lesa setningu úr helgiritunum og svara spurningu, en svarið við henni er setningin sjálf. Þótt þetta sé einfalt hjálpar æfingin þér að íhuga merkingu setninganna og leggja þær á minnið.

„Hægt er að bæta heiminn með hreinum og góðum gerðum, með lofsverðu og sæmandi framferði.“¹

1. Hvernig er hægt að bæta heiminn? _____

„Varist, ó fylgjendur Bahá, að ganga á vegum þeirra, sem segja annað en þeir gera.“²

2. Á hverra vegum ættum við ekki að ganga? _____

„Ó, verundarsonur! Statt sjálfum þér reikningsskap á hverjum degi áður en þú verður krafinn skilagreinar...“³

3. Hvað ættum við að gera dag hvern, áður en við verðum krafin skilagreinar? _____

„Seg, ó bræður: Látið gerðir en ekki orð vera prýði yðar.“⁴

4. Hvað ætti að vera okkar sanna prýði? _____

„Heilög orð og hreinar og góðar gerðir stíga upp til himins guðdómlegrar dýrðar.“⁵

5. Hvaða áhrif hafa heilög orð og hreinar og góðar gerðir? _____

2. KAFLI

Hér á eftir eru nokkrar æfingar sem tengjast þeim tilvitnunum sem þú varst að lesa. Þeim er ætlað að aðstoða þig við að hugleiða nánar mikilvægi þessara tilvitnana í þínum hópi og það ætti ekki að gerast vélrænt. Þetta þýðir ekki að ræða þurfi lengi um hverja æfingu. Þegar æfingin er krefjandi aðstoðar leiðbeinandiinn í hópnum við ítarlega könnun á henni.

1. „Lofsvert“ þýðir eitthvað sem verðskuldar hrós. Hver eftirtalinna atriða eru lofsverð?

_____ Að vera vinnusamur

_____ Að virða aðra

_____ Að vera námfús

_____ Að vera lygari

_____ Að vera latur

_____ Að þjóna öðrum

2. Hvað merkir orðasambandið „áður en þú verður krafinn skilagreinar“? _____

3. Hverjar af eftirfarandi setningum eru sannar?

_____ Það er svo fátt gott fólk í heiminum að gerðir þess breyta engu.

_____ Eitthvað er rétt þegar það er í samræmi við skoðanir annarra.

_____ Eitthvað er rétt þegar það er í samræmi við kenningar Guðs.

4. Hverjar af eftirfarandi gerðum eru sannar og góðar?

_____ Að annast börn og kenna þeim

_____ Að stela

_____ Að biðja fyrir framförum annarra

_____ Að ljúga smávegis til þess að koma sér úr vandræðum

_____ Að hjálpa öðrum og vænta verðlauna

5. Í hvaða dæmum hér á eftir segir viðkomandi annað en það sem hann/hún gerir?

_____ Einhver ítrekar í sífellu að við eigum öll að vera sameinuð en hegðun hans/hennar skapar ágreining.

_____ Einhver hrósar gildi skírlífis en stendur í kynferðissambandi utan hjónabands.

_____ Einhver drekkur áfengi annað veifið en kveðst tilheyrja trú sem bannar áfengisneyslu.

_____ Atvinnuveitandi einn kveðst vera talsmaður jafnréttis karla og kvenna en borgar konum minni laun en körlum fyrir sömu vinnu.

6. Er leyfilegt fyrir bahá'ía að játa syndir sínar fyrir annarri manneskju? _____
7. Hvað ættum við að gera í stað þess að játa syndir okkar? _____

8. Hvað merkir „himinn guðdómlegrar dýrðar“? _____

9. Hver eru áhrif illra gjörða á heiminn? _____

10. Hver eru áhrif illra gjörða á þá sem fremja þær? _____

3. KAFLI

Lestu núna og íhugaðu eftirfarandi tilvitnanir úr bahá'í ritunum. Reyndu síðan að leggja þær á minnið.

„Sannsögli er grundvöllur allra mannlegra dyggða.“⁶

1. Hver er grundvöllur allra mannlegra dyggða? _____

„Án sannsögli verða framför og velgengi sérhverrar sálar ómöguleg í öllum veröldum Guðs.“⁷

2. Hvað er óhugsandi án sannsögli? _____

„Fegrið tungur yðar, ó menn, með sannsögli, og prýðið sálir yðar djásni heiðarleika.“⁸

3. Með hverju ættum við að fegra tungur okkar? _____

4. Með hverju ættum við að prýða sálir okkar? _____

„Látið auga yðar vera tært, hönd yðar tryggja, tungu sannsögla og hjarta yðar uppljómað.“⁹

5. Hvernig ætti auga okkar að vera? _____ Hönd okkar? _____
Tunga okkar? _____ Hjarta okkar? _____

„Þeir sem dvelja í tjaldbúð Guðs og eru staðfestir í aðsetri eilífrar dýrðar munu, jafnvel þótt hungurdauði blasi við þeim, neita að rétta út höndina og taka með ólögætum hætti eignir náunga síns, hversu óverðugur og lítilmótlegur sem hann kann að vera.“¹⁰

6. Hvað ættum við að neita að gera jafnvel þótt við séum að deyja úr hungri? _____

4. KAFLI

Eins og þú hefur tekið eftir í öðrum kafla, krefjast sumar af æfingunum nákvæmra svara. Í þeim tilfellum þar sem þú ert í vafa mun leiðbeinandinn hjálpa þér og þeim sem með þér eru að ná einingu í hugsun. Í öðrum æfingum er umræðan sjálf mikilvægust og ekki er búist við neinu sérstöku svari. Æfing 3 hér fyrir neðan er í fyrri flokknum en æfing 6 í hinum seinni.

1. Sannsögli er grundvöllur allra mannlegra dyggða. Teldu upp 5 dyggðir: _____

2. Getum við áunnið okkur þessar dyggðir án sannsögli? _____
3. Hverjar af eftirfarandi fullyrðingum eru sannar?
- _____ Maður getur verið sanngjarn jafnvel þótt hann ljúgi.
- _____ Sá sem stelur hefur tryggja hönd.
- _____ Trygg hönd tekur aldrei það sem hún á ekki.
- _____ Að lesa klámbækur og klámrit er andstætt ráðleggingu Bahá'u'lláh um að hafa auga sem er tært.
- _____ Sannsögli þýðir að ljúga ekki.
- _____ Heiðarleiki er djásn sálarinnar.
- _____ Maður sem er ekki sannsögull getur tekið andlegum framförum.
- _____ Það er allt í lagi að ljúga öðru hvoru.
- _____ Frammi fyrir Guði er ásættanlegt að stela ef maður er svangur.

- _____ Að taka eitthvað án leyfis frá eigandanum, með það í hyggju að skila því seinna er ekki að stela.
- _____ Þegar við erum heiðarleg, sanngjörn og sannsögul er hjarta okkar uppljómað.
- _____ Útilokað er að stunda árangursrík viðskipti án þess að svindla lítills háttar.

4. Er hægt að ljúga að sjálfum sér? _____
5. Hverju töpum við þegar við ljúgum? _____
6. Hvernig væri heimurinn ef við værum öll sannsögul og heiðarleg? _____
- _____
- _____
- _____

5. KAFLI

Skoðaðu eftirfarandi tilvitnanir og reyndu að læra þær utanbókar. Að læra tilvitnanir úr ritunum utanbókar er mjög gefandi og þú ættir að reyna að gera sem mest af því. Auðvitað eiga ekki allir auðvelt með að leggja tilvitnanir á minnið. En ef við reynum hjálpar það okkur að greypa hugmyndirnar í huga og hjarta og fara með þær eins orðrétt og framast er unnt.

„Góðviljuð tunga orkar sem segull á hjörtu mannanna. Hún er brauð andans og íklæðir orðin merkingu; hún er uppspretta ljóss visku og skilnings.“¹¹

1. Hvernig lýsirðu góðviljaðri tungu? _____
- _____
- _____
- _____
2. Hvaða áhrif hefur góðviljuð tunga á orðin? _____
- _____

„Ó ástvinir Drottins! Á þessu helga trúarskeiði eru átök og misklíð óheimil með öllu. Sérhver árásarmaður sviptir sig náð Guðs.“¹²

3. Hvað er ekki leyfilegt á þessu helga trúarskeiði, samkvæmt þessari tilvitnun? _____
- _____

4. Hvað gerir árásarmaðurinn sjálfum sér? _____

„Ekkert getur á þessum degi skaðað þennan málstað meira en sundurlyndi og deilur, úlfúð, firring og sinnuleysi meðal ástvina Guðs.“¹³

5. Hvaða aðstæður valda málstað Guðs mestum skaða? _____

„Látið yður eigi nægja að sýna vináttu með orðum einum saman; látið hjarta yðar brenna af ást og umhyggju til allra sem verða á vegi yðar.“¹⁴

6. Hvers konar vináttu ættum við ekki að setta okkur við? _____

7. Hvað ætti að brenna bjart í hjarta okkar? _____

„Þegar hugsun um stríð kemur upp, andæfið henni þá með sterkari hugsun um frið. Hatursfullri hugsun verður að eyða með enn máttugri hugsun um kærleika.“¹⁵

8. Með hverju á að andæfa hugsun um stríð? _____

9. Með hverju á að eyða hatursfullri hugsun? _____

6. KAFLI

Gerðu eftirfarandi æfingar með tilvitnanirnar hér á undan í huga:

1. Með hvaða hætti orkar góðviljuð tunga eins og segull? _____

2. Hverjar af eftirfarandi setningum koma frá góðviljaðri tungu?

- _____ „Láttu mig í friði!“
- _____ „Hvers vegna skilurðu þetta ekki?“
- _____ „Geturðu vinsamlega beðið?“
- _____ „En hræðileg börn!“
- _____ „Þakka þér fyrir, virkilega fallegt af þér.“
- _____ „Ég hef engan tíma núna, ég er upptekinn.“

3. Við hverjar af eftirfarandi aðstæðum eru átök og misklíð til staðar?

- _____ Tveir aðilar láta í ljósi mismunandi hugmyndir um eitthvert málefni meðan á samráði stendur.
- _____ Tveir aðilar komast í uppnám og byrja að rífast meðan á samráði stendur.
- _____ Tveir aðilar hætta að mæta á vikulegar helgistundir því þeir talast ekki við.
- _____ Tveir meðlimir í hópi sem vinna saman að verkefni kvarta báðir yfir því að hinn sé ekki að leggja sig fram.

4. Hverjar af eftirfarandi aðstæðum sýna merki um firringu?

- _____ Tveir vinir mætast á förnum vegi en hunsa hvor annan.
- _____ Einhver kemur á helgistund og allir heilsa henni hlýlega.
- _____ Tveir meðlimir í hópi sýna hvor öðrum kurteisi en eru ófúsir að taka þátt í sameiginlegu verkefni.

5. Hverjar af eftirfarandi fullyrðingum eru sannar?

- _____ Maður ætti að segja nákvæmlega það sem maður hugsar um aðra og það skiptir engu máli þótt það særi þá.
- _____ Það er allt í lagi að ljúga til að forðast átök.
- _____ Hægt er að sigrast á átökum með ást og góðvild.
- _____ Orð hafa meiri áhrif þegar þau eru sögð af ást.
- _____ Það er í lagi að rífast við einhvern ef það var hann sem byrjaði.
- _____ Það er allt í lagi að hafa allt á hornum sér við aðra þegar maður er veikur eða hryggur.
- _____ Það er ekki vingjarnlegt að hlæja að öðrum þegar þeir gera eitthvað rangt.
- _____ Þegar sárar tilfinningar ríkja á milli vina, ætti hvor um sig að leggja sig fram um að nálgast hinn.
- _____ Þegar sárar tilfinningar ríkja á milli vina, ætti hvor um sig að bíða þangað til hinn sýnir viðleitni til að vingast.

7. KAFLI

Lestu tilvitnanirnar hér á eftir og leggðu þær á minnið:

„... baktal slekkur ljós hjartans og kæfir líf sálarinnar.“¹⁶

„Þeg yfir syndum annarra meðan þú sjálfur syndgar.“¹⁷

„Mæl ekki illt til að þannig verði ekki mælt til þín og mikla ekki ávirðingar annarra til þess að þínar eigin ávirðingar sýnist ekki miklar.“¹⁸

„Ó, verundarsonur! Hvernig gast þú gleymt þínum eigin ávirðingum og gert þér tíðrætt um ávirðingar annarra? Sá sem þetta gerir kallar yfir sig bölvun Mína.“¹⁹

1. Hvaða áhrif hefur baktal á þann sem baktalar? _____

2. Hvað ættum við að vera meðvituð um áður en við hugsum um syndir annars fólks? _____

3. Hvað kemur fyrir okkur ef við miklum galla annarra? _____

4. Hvað ættum við að muna þegar við hugsum um galla annars fólks? _____

8. KAFLI

Gerið eftirfarandi æfingar með tilvitnanirnar hér á undan í huga:

1. Hvað verður um framfarir sálarinnar hjá einstaklingi sem einblínir á galla annars fólks? _____

2. Hvaða áhrif hefur baktal á samfélag? _____

3. Hvað gerir þú þegar vinur þinn fer að tala um galla einhvers annars? _____

4. Merktu við hvort eftirfarandi fullyrðingar eru sannar:

- _____ Þegar við tölum um raunverulega galla einhvers erum við ekki að baktala.
- _____ Þegar við tölum samtímis um góða og slæma eiginleika einhvers erum við ekki að baktala.
- _____ Baktal er orðið síður í samfélagi okkar og við ættum að temja okkur aga til að forðast það.
- _____ Ef hlustandinn lofar að fara ekki lengra með það sem við segjum um aðra persónu, þá er enginn skaði í því að baktala hana.
- _____ Baktal er einn af verstu óvinum einingar.
- _____ Ef við tileinkum okkur þann vana að tala öllum stundum um annað fólk eigum við á hættu að fara að baktala.
- _____ Þegar rætt er um hæfileika mismunandi fólks á svæðisráðsfundi í því skyni að fá því viss verkefni þá er það baktal.
- _____ Þegar við finnum hjá okkur hvöt til að baktala ættum við að hugsa um okkar eigin galla.
- _____ Þegar við vitum um einhvern sem er að gera eitthvað sem skaðar trúna, ættum við að ræða það við meðlimi samfélagsins.
- _____ Þegar við vitum um einhvern sem er að gera eitthvað sem skaðar trúna, ættum við aðeins að upplýsa andlega svæðisráðið.
- _____ Það er ekki rangt fyrir hjón að tala um galla annars fólks þar sem þau ættu ekki að leyna hvort annað neinu.

9. KAFLI

Tilgangur þessa bókarhluta er, eins og nefnt var í upphafi, að aðstoða þátttakendur við að styrkja og þroska þá venju að lesa kafla úr helgiritunum á hverjum degi og hugleiða merkingu þeirra. Að lesa orð Guðs kvölds og morgna er meðal boða Bahá'u'lláh sem stuðla að andlegum þroska okkar. Eftirfarandi tilvitnun minnir okkur á þær gjafir sem við fáum þegar við uppfyllum þessa skyldu og við hvetjum þig til að leggja hana á minnið:

„Sökkvið yður í úthaf orða Minna, svo að þér megið afhjúpa leyndardóm þeirra og uppgötva allar perlur viskunnar, sem liggja fólgnar í djúpum þess.“²⁰

Þegar þú lýkur þessum bókahluta gætir þú orðið þér úti um bók með ritum Bahá'u'lláh og lesið í henni á hverjum degi. Hulin orð eru tilvalin í þessu skyni.

TILVÍSANIR

1. Bahá'u'lláh, tilvitnun í Shoghi Effendi, *Guðlegt réttlæti í nánd*, efnisgr. 39.
2. *Úrval úr ritum Bahá'u'lláh*, CXXXIX, efnisgr. 8, bls. 259.
3. Bahá'u'lláh, *Hulin orð*, arabíska nr. 31.
4. Sama rit, persneska nr. 5.
5. Sama rit, persneska nr. 69.
6. 'Abdu'l-Bahá, tilvitnun í Shoghi Effendi, *Guðlegt réttlæti í nánd*, efnisgr. 40.
7. Sama rit.
8. *Úrval úr ritum Bahá'u'lláh*, CXXXVI, efnisgr. 6.
9. *Töflur Bahá'u'lláh opinberaðar eftir Kitáb-i-Aqdas*, nr. 9, efnisgr. 5.
10. *Úrval úr ritum Bahá'u'lláh*, CXXXVII, efnisgr. 3, bls. 254-255.
11. Sama rit, CXXXII, efnisgr. 5, bls. 246-247.
12. *Erfðaskrá 'Abdu'l-Bahá*.
13. *Úrval úr ritum Bahá'u'lláh*, nr. V, efnisgr. 5, bls. 17.
14. Úr ávarpi sem flutt var 16. og 17. október 1911, birt í *Paris Talks: Addresses Given by 'Abdu'l-Bahá in 1911* (Wilmette: Bahá'í Publishing, 2006, 2016 printing), nr. 1.7, bls. 6.
15. Úr ávarpi sem 'Abdu'l-Bahá flutti 21. október 1911, sama rit, nr. 6.7, bls. 22.
16. *Úrval úr ritum Bahá'u'lláh*, CXXXV, efnisgr. 3, bls. 227.
17. *Hulin orð*, arabíska nr. 27.
18. Sama rit, persneska nr. 44.
19. Sama rit, arabíska nr. 26.
20. *Úrval úr ritum Bahá'u'lláh*, LXX, efnisgr. 2, bls. 122.



Bænir

Tilgangur

Að hugleiða þýðingu bæna og festa þá venju í sessi
að fara reglulega með bænir

1. KAFLI

Námskeiðum Ruhi stofnunarinnar er ætlað að aðstoða þátttakendur við að ganga á braut þjónustu. Við göngum þessa braut í tvenns konar tilgangi – að vaxa andlega og vitsmunalega og stuðla að umbreytingu þjóðfélagsins. Þetta tvennt verður ekki aðskilið. Bahá'u'lláh hvetur okkur með svofelldum orðum:

„Verið ekki önnur kafin við yðar eigin málefni; festið hugann við það, sem endurreisa mun giftu mannkynsins og helga hjörtu og sálir manna.“¹

Bahá'u'lláh segir einnig á öðrum stað:

„... tilgangurinn með því að kalla dauðlega menn frá algjörri eiveru til ríkis verundar er að þeir megi starfa að því að bæta heiminn og lifa saman í samlyndi og samstillingu.“²

Varðandi innra ástand okkar segir hann:

„Hreint hjarta er sem spegill, fæg hann með skírandi veig ástar og aðskilnaðar frá öllu nema Guði, að sólin sanna megi skína á hann og morgunn eilífðar renna upp.“³

Og ‘Abdu’l-Bahá segir okkur:

„Hjörtu ykkar verða að vera hrein og áform ykkar einlæg til þess að þið megið verða þiggjendur himneskra gjafa.“⁴

1. Við hvað eigum við að festa hugann? _____

2. Í hvaða tilgangi höfum við verið kölluð frá algjörri eiveru til ríkis verundar? _____

3. Með hverju eigum við að fægja spegil hjartna okkar? _____

4. Hver eru skilyrðin fyrir að þiggja himneskar gjafir? _____

5. Eru einhverjar af eftirfarandi fullyrðingum réttar?
- Þú átt fyrst að annast sjálfa(n) þig og síðan getur þú annast aðra.
 - Ef þú ert alltaf að hjálpa öðrum missir þú að lokum sjónar á eigin markmiðum.
 - Þú ert þinn eigin besti vinur.
 - Mikilvægast af öllu er að komast að því hvað gerir mann hamingjusaman.
 - Fylgdu draumum þínum og þeir munu færa þér hamingju.
 - Það skiptir ekki máli hvað þú gerir meðan þú særir ekki aðra.
 - Það er í lagi að sýna eigingirni meðan þú gerir eitthvað gott fyrir aðra.

2. KAFLI

Tvíþættum tilgangi okkar fylgir sú fullvissa að við höfum öll verið sköpuð góð og göfug. Bahá'u'lláh segir:

„Ó, sonur andans! Auðugan skóp Ég þig, því auðmýkir þú sjálfan þig í allsleysi? Göfugan gerði Ég þig, því sækist þú eftir lægingu? Úr kjarna þekkingar gaf Ég þér líf, því leitar þú fræðslu hjá öðrum en Mér? Úr leir kærleikans mótaði Ég þig, því gerir þú þér títt um aðra? Bein sjónum þínum að sjálfum þér svo að þú megir finna Mig standa hið innra með þér, máttugan, voldugan og sjálfumnógan.“⁵

Gagnlegt er að fylla í eyðurnar hér á eftir þegar þú hugleiðir þessi orð.

„Ó, sonur andans! _____ skóp Ég þig, því auðmýkir þú _____
þig í _____ ? _____ gerði Ég þig, því
sækist þú eftir _____ ? Úr kjarna _____ gaf Ég
þér _____ , því _____ þú _____ hjá öðrum en Mér?
Úr leir _____ mótaði Ég þig, því gerir þú þér _____ um
_____ ? Bein _____ þínum að _____ þér svo að
þú megir finna _____ standa hið innra með þér , _____ ,
_____ og _____.“

Til að sýna göfugri sál okkar trúnað verðum við að snúa okkur að uppsprettu tilverunnar og leita uppfræðslu hjá honum. Ein áhrifamesta leiðin í þessu skyni er bænin. Shoghi Effendi, Verndari trúarinnar, segir að meginmarkmið hennar sé „þroski einstaklingsins og samfélagsins með hjálp andlegra dyggða og krafta. Fyrst þarf að næra sál mannsins. Og bænin er besta andlega næringin.“⁶

3. KAFLI

Guð er alvís og alvitur. Hann skapaði okkur, veit hvað býr í hjörtum okkar og hvað er okkur fyrir bestu. Hann þarf ekki á bænum okkar að halda. Hvers vegna erum við þá að biðja?

‘Abdu’l-Bahá segir:

„Í æðstu bæninni biðja menn einungis sakir ástar á Guði, en hvorki af ótta við Hann eða hel, eða í von um gjafir eða vist á himnum.... Verði maður ástfanginn af einhverri mannveru, þá er ógjörningur að koma í veg fyrir að hann nefni nafn þess sem hann elskar. Hversu miklu erfiðara er að láta vera að nefna nafn Guðs, þegar maður hefur lært að elska Hann.... Hinn andlegi maður finnur ekki unað í neinu nema að minnast Guðs.“⁷

Þannig svaraði hann spurningu sem lögð var fyrir hann:

„Ef einhver vinanna elskar einhvern, er þá ekki eðlilegt að hann vilji segja það? Þótt hann viti að vininum sé kunnugt um ást hans, langar hann samt ekki að segja honum frá því?... Það er rétt að Guð þekkir óskir allra hjartna, en hvötin til að biðja er mannum eðlileg og sprettur af ást manns til Guðs.“⁸

1. Ljúktu eftirfarandi setningum:

- a. Í _____ bæninni _____ við sakir _____ á Guði, en hvorki af ótta við Hann eða _____, eða í von um _____ eða vist á _____.
- b. Verðum við _____ af einhverri mannveru, þá er _____ að koma í veg fyrir að við nefnum _____ þess sem við _____ . Hversu miklu _____ er að láta vera að _____ nafn _____, þegar maður hefur lært að _____ Hann.
- c. Andlegur einstaklingur finnur ekki _____ í neinu nema að _____ Guðs.

2. Hvers vegna biðjum við? _____

3. Hvað merkir „að minnast Guðs“? _____

4. Hver er heitasta ósk þess sem elskar aðra persónu? _____

5. Hvaðan kemur hvötin til að biðja? _____

4. KAFLI

Í bæn sem Bahá'u'lláh opinberaði lesum við eftirfarandi:

„Ég sárbæni Þig ... að gera úr bæn minni bál, sem brenni hulurnar sem hafa byrgt mér sýn á fegurð Þína og ljós sem leiði mig til úthafs návistar Þinnar.“⁹

Í sömu bæn biðjum við Guð:

„Ger úr bæn minni, ó Drottinn minn, lind lifandi vatna svo ég megi lifa meðan veldi Þitt varir og nefna Þig í sérhverri veröld veralda Þinna.“¹⁰

1. Í hvaða skilningi getur bænin verið eins og bál? Hvað brennir hún? _____

2. Nefndu nokkrar hular sem byrgja okkur sýn á Guð: _____

3. Getur bæn verið eins og ljós? Hvert leiðir það okkur? _____

4. Getur bæn verið eins og lind lifandi vatna? Hvað gefur hún sálum okkar? _____

5. KAFLI

Lestu og íhugaðu eftirfarandi orð ‘Abdu’l-Bahá:

„Ekkert er ljúfara í heimi verundarinnar en bæn. Maðurinn verður að lifa í bænarástandi. Ástand bænar og auðmýktar er blessunarríkasta ástandið. Bæn er samtal við Guð. Æðsti árangur eða sæluríkasta ástandið er ekkert annað en samtal við Guð. Það leiðir til andlegleika, meðvitundar og himneskra tilfinninga, fæðir af sér aðlöðun að ríki Guðs og veldur næmleika æðri vitsmuna.“¹¹

1. Hvað er ljúfasti ástandið í heimi verundarinnar? _____

2. Hvað merkir orðið „bænarástand“? _____

3. Nefndu nokkra eiginleika sem bænin skapar: _____

4. Skoðaðu aftur tilvitnanirnar í síðustu köflum og skrifaðu fimm setningar um eðli bænar.
 - Bæn er _____
 - Bæn er _____
 - Bæn er _____
 - Bæn er _____
 - Bæn er _____

6. KAFLI

Lesum eftirfarandi orð Bahá'u'lláh og hugleiðum þau:

„Syng, ó þjónn Minn, vers Guðs sem þér hafa borist, eins og þeir syngja þau sem hafa nálgast Hann, svo að sætleiki söngs þíns megi tendra eld í þinni eigin sál og laða að sér hjörtu allra manna. Hver sem í einrúmi vistarveru sinnar les versin sem Guð hefur opinberað – dreifandi englar Hins almáttuga munu dreifa víða vegu angan orðanna sem munnur hans mælir og valda því að hjarta hvers réttláts manns slær hraðar. Þótt hann í fyrstu kunni að vera sér óvitandi um áhrif þeirra, mun náðin sem veitist honum fyrr eða síðar hafa áhrif sín á sál hans. Þannig hafa leyndardómar Guðs verið ákvarðaðir í krafti vilja Hans sem er uppspretta valds og visku.“¹²

1. Hvernig eigum við að syngja vers Guðs? _____

2. Hvaða áhrif hefur sætleiki söngs okkar á sálina? _____

3. Hvaða áhrif hefur sætleiki söngs okkar á hjörtu annarra? _____

7. KAFLI

Þú gætir viljað leggja eftirfarandi tvær helgigreinar á minnið. Þær eru úr bæn sem Bahá'u'lláh opinberaði:

„Ó Guð, Guð minn! Lít ekki á vonir mínar og gerðir, nei, lít heldur á vilja þinn sem umlykur himna og jörð. Við þitt mesta nafn, ó Þú Drottinn allra þjóða! Ég hef þráð aðeins það sem Þú þráðir og elska einungis það sem Þú elskar.“¹³

„Þú ert hærri en svo að lofgjörð þeirra sem nálægir eru þér geti stigið upp til himins návistar þinnar eða fuglar hjartna þeirra sem eru helgaðir þér nái til hliðs þíns. Ég ber því vitni að Þú ert helgaður ofar öllum eigindum og heilagur ofar öllum nöfnum. Enginn Guð er nema Þú, hinn æðsti og aldýrlegi.“¹⁴

8. KAFLI

‘Abdu’l-Bahá segir:

„Það sæmir þjóninum að biðja til Guðs og leita aðstoðar Hans, sárþæna Hann og biðja um hjálp Hans. Slíkt sæmir stöðu þjónustu og Drottinn mun ákvarða hvaðeina sem Honum þóknast í samræmi við fullkomna visku sína.“¹⁵

Og hann útskýrir:

„Andinn hefur áhrif og bænin hefur andlegar afleiðingar. Þess vegna biðjum við svo: „Ó Guð! Lækna þennan sjúkling!“ Kannski mun Guð svara. Skiptir það máli hver biður? Guð mun svara bæn sérhvers þjóns ef sú bæn er brýn. Miskunn Hans er mikil, takmarkalaus. Hann svarar bænum allra þjóna sinna. Hann svarar bæn þessarar jurtar. Hugsanlega biður þessi jurt: „Ó Guð! Sendu mér regn!“ Guð svarar bæninni og jurtin vex. Guð mun svara hverjum sem er.“¹⁶

Það er eðlilegt að við biðjum Guð um að uppfylla þarfir okkar. Þannig biðjum við fyrir heilsu okkar og ástvinu okkar. Við biðjum fyrir andlegum og efnislegum framförum fjölskyldna okkar og um leiðsögn. Við biðjum um styrk, trú og staðfestingu á þjónustubrautinni. Þegar við biðjum til Guðs ættum við auðvitað að muna að markmið okkar í lífinu er að laga vilja okkar að vilja hans. Þess vegna verðum við að biðja hann um að gera vilja sinn og vera tilbúin að lúta honum. Ef við leggjum eftirfarandi orð ‘Abdu’l-Bahá á minnið munu þau alltaf veita gleði og fullvissu:

„Ó þú sem snýrð ásjónu þinni til Guðs! Loka augum þínum fyrir öllu öðru og opna þau fyrir ríki Hins aldýrlega. Bið hvers sem þú vilt af Honum einum, leita alls þess sem þú leitar hjá Honum einum. Með einu augnatilliti uppfyllir Hann hundrað þúsund vonir, í einni svipan græðir Hann hundrað þúsund ólæknandi mein, í einni sjónhending leggur Hann smyrsl á sérhverja und, með einni höfuðhneigingu leysir Hann hjörtun úr hlekkjum sorgar. Hann gerir það sem Hann gerir, og hvers úrkosti eigum við? Hann framkvæmir vilja sinn og ákvarðar það sem Honum þóknast. Þeim mun betra er fyrir þig að beygja höfuð þitt í undirgefni og setja traust þitt á Drottin allra miskunnsemda.“¹⁷

9. KAFLI

Ljóst er af því sem við höfum kynnt okkur fram til þessa að bæn til Guðs er nauðsyn andlegu lífi. Það vekur sérstaklega ljúfar tilfinningar að biðja til Guðs fljótlega eftir að við vöknum á morgnana og á kvöldin áður en við förum að sofa. Það fer eftir þörfum okkar og andlegum þorsta hvaða tíma við verjum til bæna daglega og hversu margar bænir við förum með. Við getum í hvert sinn valið úr mörgum bænum sem Bahá'u'lláh, Bábinn og 'Abdu'l-Bahá hafa opinberað. Bahá'u'lláh hefur einnig opinberað þrjár daglegar skyldubænir. Shoghi Effendi segir:

„Daglegu skyldubæinir eru þrjár talsins. Sú stysta er einn helgitexti sem fara þarf með á miðdegi einu sinni á sólarhring. Með lengri skyldubænina, sem hefst á orðunum „Guð ber því vitni að enginn er Guð nema Hann“, þarf að fara með þrisvar á dag, á morgnana, á hádegi og á kvöldin. Þessari bæn fylgja sérstakar stellingar og látbragð. Með lengstu bænina sem er fjölpættust þessara þriggja skyldubæna þarf að fara einu sinni á sólarhring og hvenær sem biðjandinn kýs.

Átrúandanum er frjálst að velja hverja sem er af þessum þremur bænum en honum er skylt að fara með eina þeirra í samræmi við þau sérstöku fyrirmæli sem fylgja henni.“¹⁸

Hann segir einnig:

„Þessar daglegu skyldubænir, ásamt nokkrum öðrum tilteknum bænum, svo sem Lækningabænni og Töflu Aḥmads, hefur Bahá'u'lláh gætt sérstökum mætti og merkingu, og því skyldu þær viðurkenndar sem slíkar og átrúendurnir ættu að lesa þær með efunarlausri trú og fullvissu, svo að þeir megi með tilstuðlan þeirra komast í miklu nánara samneyti við Guð og geti samkennt sig í enn ríkari mæli lögum Hans og fyrirmælum.“¹⁹

Skyldubæinir þrjár sem Bahá'u'lláh opinberaði á að fara með í einrúmi. Safnaðarbænir sem farið er með í hóp samkvæmt ákveðnum helgisíðum eru ekki til í bahá'í trúnni. Útfararþænin er eina safnaðarbænin sem bahá'í lög mæla fyrir um. Einn útfarargesta fer með hana áður en jarðsetning fer fram, en aðrir gestir standa á meðan í þögn.

1. Hvað merkir orðið „skyldubæn“? _____

2. Hve margar daglegar skyldubænir opinberaði Bahá'u'lláh? _____

3. Eigum við að fara með allar skyldubæinir daglega? _____
4. Ef við veljum lengstu skyldubænina, hversu oft á dag eigum við að fara með hana? _____

5. Hversu oft ef við veljum lengri skyldubænina? _____

6. Hversu oft ef við veljum stuttu skyldubænina? _____

7. Nefndu nokkrar bænir sem eru gæddar sérstökum mætti: _____

8. Leggðu stuttu skyldubænina á minnið, hafir þú ekki gert það nú þegar:

„Ég ber því vitni, ó Guð minn, að Þú hefur skapað mig til að þekkja Þig og tilbiðja Þig. Ég staðfesti á þessu andartaki vanmátt minn og mátt Þinn, fátækt mína og auðlegð Þína.

Enginn er Guð nema Þú, hjálpin í nauðum, hinn sjálfumnógi.“²⁰

9. Hverju berum við vitni í þessari bæn? _____

10. KAFLI

Við ættum að muna að auk þeirra blessana sem okkur hlotnast þegar við hlýðum lögum um skyldubænir og næringarinnar sem það veitir að fara með bænir í einrúmi, örvar það sálir okkar að heyra bænir lesnar á samkomum, litlum eða stórum. Bahá'u'lláh segir:

„Komið saman í miklum fögnuði og vináttu og lesið þau heilögu orð sem miskunnsamur Drottinn hefur opinberað. Þannig opnast dyr sannrar þekkingar innri verund yðar og þá finnið þér staðfestu í sálum yðar og hjörtu yðar fyllast geislandi gleði.“²¹

Það er okkur öllum gleðiefni að víðs vegar um heiminn fjölgar mjög ört helgistundum þar sem vinir og nágrannar koma saman til að samneyta Guði. Allsherjarhús réttvísinnar skrifar:

„Helgistundir eru viðburðir sem allar sálir geta sótt og andað þar að sér himneskum ilmi, upplifað sætleika bænarinnar, hugleitt hið skapandi orð, hafist upp á vængjum andans og samneytt Ástvininum eina. Þar skapast andi vináttu og sameiginlegs málstaðar, sérstaklega í andlega innihaldsríkum samræðum sem eðlilega eiga sér stað á slíkum stundum og geta opnað „borg mannshjartans“.“²²

Þegar við finnum löngun til að biðja, bíðum við þögn í litla stund til að hreinsa huga okkar af veraldlegum hlutum. Meðan við biðjum beinum við huganum að Guði. Þegar bænagerð lýkur, höldum við kyrru fyrir í nokkra stund og förum ekki strax að gera eitthvað annað. Það sama á við þegar við hlustum á bænir annarra á samfundum. Við slík tækifæri mótast viðhorf okkar af bænarhug og við fylgjumst vel með bæninni líkt og við værum sjálf að fara með hana.

1. Í hvaða anda eigum við að koma saman þegar við förum með orð Guðs? _____

2. Hver eru áhrifin af því að koma saman og fara með orð Guðs? _____

3. Helgistundir eru viðburðir sem allar sálir geta
– _____ og
– _____ ,
– _____ ,
– _____ ,
– _____ og
– _____ .
4. Hvers konar andi skapast á helgistundum? _____

5. Hver eru áhrifin af andlega innihaldsríkum samræðum sem eðlilega eiga sér stað á helgistundum? _____

6. Skrifaðu nokkur orð um það viðhorf lotningar sem við eigum að sýna þegar við biðjum, hvort sem við erum ein eða saman á fundi.

11. KAFLI

Fyrsti hluti þessarar bókar fjallaði um þá venju að lesa kafla úr bahá'í ritunum á hverjum degi og velta fyrir okkur merkingu þeirra. Hér höfum við íhugað mikilvægi bænarinnar og þannig reynt að festa í sessi þá venju að biðja daglega. Síðasti kaflinn vakti athygli okkar á mikilvægi sameiginlegrar tilbeiðslu. Allt sem við höfum ígrundað fram til þessa hefur búið okkur undir að ráðast í, ef við viljum, fyrsta verk okkar á þjónustubrautinni, að halda reglulegar helgistundir.

Fyrsta skrefið gæti verið að leggja á minnið nokkrar bænir og finna tækifæri til að deila þeim með nokkrum vinum. Um leið ættir þú að tryggja að þú sækir að minnsta kosti eina helgistund í samfélagi þínu og sért meðal áhugasamra stuðningsmanna hennar. Loks gætir þú ákveðið að standa sjálf(ur) fyrir helgistundum og bjóða vinum þínum, fjölskyldumeðlimum og nágrönnum að koma reglulega saman til bæna og samveru. Ekki er óalgengt að tveir eða þrír þátttakendur í þessu námskeiði byrji að halda slíkar helgistundir saman.

Eins og þú getur ímyndað þér er engin formúla fyrir því hvernig skipuleggja á helgistund. En hún er augljóslega vinafundur þar sem bænir eru beðnar, kaflar úr ritunum lesnir og innihaldsríkar samræður eiga sér stað – allt í andlegu andrúmslofti. Getur þú sagt nokkur orð um hverja af eftirfarandi hugmyndum í tengslum við helgistundir?

Hlýtt og ástríkt heimboð:

Að skapa umhverfi þar sem allir eru velkomnir:

Að viðhalda andrúmslofti lotningar:

Að stuðla að glöðum félagsskap:

Að hvetja til andlega innihaldsríkra samræðna:

TILVÍSANIR

1. *Úrval úr ritum Bahá'u'lláh*, XLIII, efnisgr. 4.
2. Bahá'u'lláh, *Trustworthiness: A Compilation of Extracts from the Bahá'í Writings*, samantekt Rannsóknardeildar Allsherjarhúss réttvísinnar (London: Bahá'í Publishing Trust, 1987), nr. 21, bls. 5.
3. *Leitandinn á vegi Guðs: Úrval úr dulhyggjuritum Bahá'u'lláh* (Bahá'í útgáfan, 2019), Dalirnir sjö, efnisgr. 43, bls. 17.
4. Úr ávarpi sem flutt var 5. maí 1912, birt í *The Promulgation of Universal Peace: Talks Delivered by 'Abdu'l-Bahá during His Visit to the United States and Canada in 1912* (Wilmette: Bahá'í Publishing, 2012), bls. 127.
5. Bahá'u'lláh, *Hulin orð*, arabíska nr. 13.
6. Úr bréfi dagsettu 8. desember 1935. Skrifað fyrir hönd Shoghi Effendi, birt í *Prayer and Devotional Life: A Compilation of Extracts from the Writings of Bahá'u'lláh, the Báb, and 'Abdu'l-Bahá and the Letters of Shoghi Effendi and the Universal House of Justice*, samantekt Rannsóknardeildar Allsherjarhúss réttvísinnar (Wilmette: Bahá'í Publishing, 2019), nr. 71, bls. 31.
7. Orð 'Abdu'l-Bahá, tilvitnun í J. E. Esslemont, *Bahá'u'lláh og nýi tíminn*.
8. Sama rit.
9. Bahá'u'lláh, í *Bahá'í bænir: Úrval bæna opinberaðar af Bahá'u'lláh, Bábinum og 'Abdu'l-Bahá* (Bahá'í útgáfan, 2016), bls. 8.
10. Sama rit, bls. 9.
11. Orð 'Abdu'l-Bahá, tilvitnun í *Star of the West*, 8. bindi, nr. 4 (17. maí 1917), bls. 41.
12. *Úrval úr ritum Bahá'u'lláh*, CXXXVI, efnisgr. 2; einnig í *Bahá'í bænir*, bls. v.
13. Bahá'u'lláh, í *Bahá'í bænir*, bls. 9.
14. Sama rit, bls. 12.
15. 'Abdu'l-Bahá, í *Prayer and Devotional Life*, nr. 24, bls. 7.
16. Úr ávarpi sem 'Abdu'l-Bahá flutti 5. ágúst 1912, birt í *The Promulgation of Universal Peace*, bls. 345.
17. *Selections from the Writings of 'Abdu'l-Bahá* (Wilmette: Bahá'í Publishing, 2010, 2015 printing), nr. 22.1, bls. 75–76.
18. Úr bréfi dagsettu 10. janúar 1936. Skrifað fyrir hönd Shoghi Effendi, birt í *Prayer and Devotional Life*, nr. 61, bls. 25.

19. Úr bréfi dagsettu 10. janúar 1936. Skrifað fyrir hönd Shoghi Effendi, tilvitnun í *Bahá'í bænir*, bls. 213.
20. Bahá'u'lláh, í Bahá'í bænir, bls. 4.
21. Bahá'u'lláh, í *Prayer and Devotional Life*, nr. 68, bls. 29.
22. Úr skilaboðum Allsherjarhúss réttvísinnar dagsettum 29. desember 2015.



Líf og dauði

Tilgangur

Að skilja það og meta að lífið felst ekki aðeins
í breytingum og umskiptum þessa heims
heldur finnur sanna þýðingu sína
í þroska sálarinnar

1. KAFLI

Mannssálin er hafin yfir þennan efnislega heim. Í einu af ávörpum sínum útskýrir ‘Abdu’l-Bahá:

„Þessir efnislegu líkamar eru samsettir af öreindum og þegar tengslin milli þeirra rofna hefst hrörnun og síðan kemur það sem við köllum dauði....

Öðru máli gegnir um sálina. Sálin er ekki samsetning frumefna, hún er ekki samsett af fjölda öreinda, hún er ein og ósundurgreinanleg og þess vegna er hún eilíf. Hún er algjörlega utan efnislegrar sköpunar, hún er ódauðleg!“¹

1. Hvað þýðir orðasambandið „samsettur af“? _____
2. Er mannssálin samsett af ýmsum frumefnum eins og mannlíkaminn? _____
3. Er mannssálin efnislegt fyrirbæri? _____

2. KAFLI

Í bréfi sem var skrifað fyrir hönd Verndarans segir að „sál mannsins verði til við getnað“². Í svari við spurningu um merkingu orðsins „getnaður“ segir Allsherjarhús réttvísinnar:

„Ekkert hefur fundist í bahá’í ritum sem skilgreinir með nákvæmni líffræðilega stund og eðli þess atburðar sem nefnist „getnaður“. Notkun orðsins virðist einnig vera ónákvæm í læknisfræðilegu samhengi. Raunar er einn skilningur á getnaði sá að hann fari saman við frjóvgun, en annar er sá að hann eigi sér stað að lokinni frjóvgun og bólfestu fósturvísis, þ.e. upphafi þungunar. Þess vegna virðist ekki vera hægt að vita með vissu hvenær sálin tengist efnislegu formi sínu og óvíst er að mannshugurinn eða rannsóknir geti leyst úr slíkum spurningum þar sem þær tengjast leyndardómum hins andlega heims og eðli sálarinnar sjálfrar.“³

1. Hvenær verður mannssálin til? _____

2. Lýsir orðið „getnaður“ nákvæmu líffræðilegu augnabliki? _____

3. KAFLI

Tengsl sálar og líkama eru ekki efnisleg; sálin fer ekki inn í líkamann eða yfirgefur hann og hún hefur ekki efnislegt rými. Tengslum hennar við líkamann má líkja við ljósið í

speglinum. Ljósið birtist í speglinum en það er ekki inni í honum. Á sama hátt er sálin ekki í líkamanum. ‘Abdu’l-Bahá segir:

„Hin skynigædda sál, eða mannsandinn, fer ekki inn í líkamann og er ekki sama eðlis og hann – það er að segja, hún dvelur ekki í honum. Því að innganga og eðlislægni eru líkamleg einkenni og hin skynigædda sál er yfir þau helguð. Sálin fór aldrei inn í þennan líkama í upphafi og þarf þess vegna ekki að finna sér annan dvalarstað þegar hún yfirgefur hann. Nei, tengsl andans við líkamann eru eins og tengsl ljóssins í þessum lampa við spegil. Sé spegillinn hreinn og fægður birtir hann ljósið frá lampanum. En sé spegillinn brotinn eða hulinn ryki endurspeglar hann ekki ljósið.“⁴

1. Fyllið í eyðurnar hér á eftir.

- a. Hin skynigædda sál, eða _____, fer ekki inn í líkamann og er ekki sama eðlis og hann – það er að segja, hún _____ ekki í honum.
- b. Hin _____, eða mannsandinn, dvelur ekki í líkamanum. Því að innganga og eðlislægni eru _____ og hin skynigædda sál er _____.
- c. Sálin fór aldrei inn í _____ í upphafi og þarf þess vegna ekki að finna sér _____ þegar hún yfirgefur hann.
- d. Tengsl andans við líkamann eru eins og tengsl _____.
- e. Sé spegillinn hreinn og fægður birtir hann _____.
- f. Sé spegillinn brotinn eða hulinn ryki _____.

2. Merktu við hvort eftirfarandi fullyrðingar eru sannar með hliðsjón af því sem við höfum lært fram til þessa:

- _____ Sálin tilheyrir ekki efnisheiminum.
- _____ Sálin er inni í líkamanum.
- _____ Líkaminn er eigandi sálarinnar.
- _____ Sálin er ódauðleg.
- _____ Einstaklingurinn verður til þegar sálin tengist fósturvísinum.
- _____ Lífið byrjar þegar einstaklingurinn fæðist í þennan heim.
- _____ Efnisleg tilvist einstaklingsins heldur áfram eftir dauðann.
- _____ Lífið er það sem kemur fyrir okkur á hverjum degi.

3. Notið samlíkinguna um ljós og spegil til að lýsa tengslum sálarinnar og líkamans: ____

4. KAFLI

Það eru mjög sérstök tengsl milli sálar og líkama sem í sameiningu mynda einstaklinginn. Þessi tengsl endast aðeins meðan á þessu jarðlífi stendur. Þegar þau rofna hverfa sál og líkami til uppruna síns – líkaminn til dustsins og sálin til andlegra veralda Guðs þar sem hún heldur áfram að þroskast. ‘Abdu’l-Bahá segir:

„Mannsandinn á sér upphaf en engan endi. Hann varir að eilífu.“⁵

‘Abdu’l-Bahá útskýrir í einu af ávörpum sínum:

„Andinn þarf ekki á líkama að halda, en líkaminn þarfnast anda, að öðrum kosti deyr hann. Sálin getur lifað án líkama, en líkami án sálar deyr.“⁶

Og Verndarinn útskýrir:

„Varðandi sál mannsins: Samkvæmt bahá’í kenningum hefst tilvist mannsálarinnar með fósturvísinum og hún heldur áfram að þroskast gegnum endalaus tilverustig eftir aðskilnaðinn við líkamann. Framfarir hennar og þroski eiga sér því engin takmörk.“⁷

1. Svaraðu eftirfarandi spurningum með hliðsjón af tilvitnunum að ofan:

a. Þarf líkaminn sál? _____

b. Þarf sálin líkama? _____

c. Hvað verður um tengsl líkama og sálar þegar við deyjum? _____

d. Hvað verður um sálina eftir dauðann? _____

e. Hversu lengi getur sálin þroskast? _____

f. Hvenær lýkur lífinu? _____

2. Hverjar af eftirfarandi fullyrðingum samræmast því sem við höfum lært í undanförunum köflum?

- _____ Dauðinn er refsing.
- _____ Tengsl líkama og sálar vara aðeins meðan á jarðlífinu stendur.
- _____ Líkaminn getur tekið framförum að eilífu.
- _____ Sálin mun þróast að eilífu.
- _____ Dauðinn er endalok lífsins.
- _____ Líkamar okkar rísa upp á dómsdegi.
- _____ Dauðinn veitir sálinni meira frelsi en hún hafði áður.
- _____ Lífinu lýkur með dauðanum.
- _____ Við ættum að óttast dauðann.
- _____ Matur, föt, hvíld og afþreying eru sálinni nauðsyn.
- _____ Sálin þreytist þegar líkaminn notar orku.
- _____ Líkamleg veikindi hafa ekki áhrif á sálina.
- _____ Eftir dauðann höfum við enn þá efnislegar þarfir.

5. KAFLI

Við höfum skilið að sálin hefur ekkert efnislegt rými og starfar ekki samkvæmt náttúru- lögmálum eins og efnislegir hlutir. Sálin hefur áhrif í þessum heimi með tilstyrk líkamans en hún getur líka starfað án hans. Bahá'u'lláh segir:

„Sannlega segi Ég, mannssálin er hafin yfir útgöngu og inngöngu. Hún stendur kyrr og samt svífur hún; hún hreyfist og samt er hún kyrr.“⁸

Og ‘Abdu’l-Bahá segir:

„Vita skalt þú að áhrif og skynjun mannsandans, starfsemi hans og skilningur er með tvennum hætti. Að einu leyti starfar andi mannsins með milligöngu líkama og líffæra. Þannig sér hann með auganu, heyrir með eyranu, talar með tungunni...

Að öðru leyti starfar mannsandinn og hefur áhrif án milligöngu líkamans og líffæra hans. “⁹

1. Fylltu í eyðurnar hér á eftir:
- a. Mannssálin er hafin yfir _____ og _____ .
 - b. Hún stendur _____ og samt _____ hún.
 - c. Hún _____ og samt er hún _____ .

2. Lýstu þeim tveimur leiðum sem sálin notar til að skynja og beita áhrifum í þessum heimi: _____

3. Getur þú gefið dæmi um áhrif og aðgerðir sálarinnar án tilstyrks líkamans? _____

6. KAFLI

Lestu eftirfarandi helzigrein úr ritum Bahá'u'lláh með hliðsjón af umræðunni í undanförunum köflum:

„Vita skalt þú, að sál mannsins er óháð og ofar öllum líkamlegum og hugrænum sjúkleika. Sýni sjúkur maður hnignunarmerki stafa þau af hindrunum sem koma á milli sálar hans og líkama, því sálin er sjálf óháð öllum líkamlegum meinsemdum. Íhuga ljósið sem skín í lampanum. Þótt ytri fyrirstaða geti skyggt á birtu þess heldur ljósið áfram að skína og birta þess dofna ekki. Sömuleiðis hindrar sérhver sjúkleiki sem hrjáir líkama mannsins sálina frá því að birta áskapaðan mátt sinn og vald. Þegar hún yfirgefur líkamann verða yfirráð hennar og áhrifavald þess eðlis að engu afli á jörðu verður við það jafnað. Sérhver hrein, faguð og helguð sál öðlast feiknlegt vald og fagnar með mikilli gleði.“¹⁰

1. Útskýrðu með þínum eigin orðum hvernig sálin er óháð líkamlegum eða hugrænum veikindum og hvað koma mun í ljós við aðskilnað hennar frá líkamanum.

2. Höldum við einkennum okkar sem einstaklingar eftir líkamsdauðann? _____

7. KAFLI

Bahá'u'lláh segir:

„Víkjum nú að spurningu þinni um sál mannsins og líf hennar eftir dauðann. Vita skalt þú í sannleika, að sálin heldur áfram að þróast eftir viðskilnaðinn við líkamann uns hún kemst í návist Guðs í þess konar ástandi og ásigkomulagi að hvorki framrás alda og árpúsunda né breytingar og umskipti þessa heims geta náð til hennar. Hún varir jafn lengi og ríki Guðs, yfirráð Hans, vald og herradómur. Hún birtir tákn Guðs og eigindir Hans og opinberar ástríki Hans og hylli.“¹¹

1. Hversu lengi heldur sálin áfram að þroskast eftir líkamsdauðann? _____

2. Í hvaða ástandi heldur sálin áfram eilífri ferð sinni áleiðis til Guðs? _____

3. Hvaða eigindir og tákn birtir sálin í því ástandi? _____

4. Merktu við hvort eftirfarandi fullyrðingar eru sannar með hliðsjón af því sem við höfum lært fram að þessu:

_____ Ríki Guðs varir að eilífu.
_____ Sálin getur birt eigindir Guðs.
_____ Bænir okkar fyrir framliðnum hafa ekki áhrif á framfarir sálna þeirra.
_____ Sálin hættir aldrei að vera til.

8. KAFLI

Bahá'u'lláh segir:

„Vita skalt þú að sérhvert heyrandi eyra, sem varðveitt er hreint og óflekkað, hlýtur ávallt og hvaðanæva að heyra röddina sem mælir þessi heilögu orð: „Sannlega erum við Guðs og til Hans munum við aftur snúa.“ Leyndardómum líkamsdauðans og endurkomu mannsins hefur ekki verið ljóstrað upp og enn eru þeir ólesnir....

Dauðinn býður sérhverjum fullvissuðum átrúanda þann bikar sem er lífið sjálft. Hann veitir fögnuð og miðlar gleði. Hann færir eilíft líf að gjöf.

„Ó, sonur hins æðsta! Ég hefi gert dauðann að sendiboða fagnaðar til þín. Því ert þú dapur? Ég hefi úthellt yfir þig dýrð ljóssins. Því hylur þú ásjónu þína?“¹³

- _____ Sál mannsins kemur frá Guði og snýr til hans aftur.
- _____ Öll þekking á lífinu eftir dauðann er hjá Guði.
- _____ Fyrir fullvissaðan átrúanda er dauðinn líf.
- _____ Dauðinn er sendiboði fagnaðar.
- _____ Allir leyndardómar dauðans eru þekktir.
- _____ Við ættum að meta gjöf lífsins mikils en samt ekki óttast dauðann, því hann er sendiboði fagnaðar.
- _____ Það er ekki mikilvægt fyrir okkur að þekkja til lífsins eftir dauðann.

-
- This image shows a blank sheet of white paper with horizontal ruling lines. The lines are evenly spaced and run across the width of the page. There are no margins, text, or other markings on the paper.

9. KAFLI

‘Abdu’l-Bahá útskýrir:

„Upphaf mannsins er í heimi móðurlífsins þar sem hann þróar hæfni og verðleika sem gera honum kleift að taka framförum í þessum heimi. Kraftana sem honum eru nauðsynlegir í þessum heimi fékk hann í móðurlífi. Þar fékk hann sjónina og heyrnina sem hann þarf á að halda í þessum heimi. Alla þá krafta sem hann þarfnast í þessum heimi fékk hann í móðurlífi. Í þeim heimi var hann búinn undir það sem beið hans hér og þegar hann kom í þennan heim komst hann að raun um að hann hafði fengið alla þá krafta sem honum voru nauðsynlegir, alla limi og líffæri sem eru nauðsynleg þessu lífi fékk hann þar. Þar af leiðandi verður hann líka í þessum heimi að búa sig undir það sem bíður hans í næsta lífi. Þess sem hann þarfnast í ríki Guðs verður hann að afla sér búa sig undir í þessari veröld. Líkt og hann fékk kraftana sem nauðsynlegir eru þessum heimi í móðurlífi, þannig verður hann einnig að fá það sem hann þarfnast í ríki Guðs – það er að segja alla hina himnesku krafta – í þessum heimi.“¹⁴

1. Merktu við hvort eftirfarandi setningar eru réttar eða rangar:

- _____ Alla krafta sem eru nauðsynlegir í þessum heimi fáum við í heimi móðurlífsins.
- _____ Það er engin þörf á að búa sig undir lífið í næsta heimi.
- _____ Það sem við þurfum á að halda í ríki Guðs fáum við þar.
- _____ Tilgangurinn með þessu lífi er að öðlast krafta sem eru nauðsynlegir í næsta heimi.
- _____ Hið sanna líf hefst þegar maður deyr og heldur til ríkis Guðs.
- _____ Hið sanna líf hefst í þessum heimi og heldur áfram eftir líkamsdauðann.

2. Hverjir eru þeir kraftar sem maðurinn fær í heimi móðurlífsins? _____

3. Hvaða krafta þurfum við að afla hér fyrir lífið eftir dauðann? _____

10. KAFLI

Bahá’u’lláh segir:

„Öll skylda mannsins á þessum degi felst í því að höndla sinn skerf af þeim gnægtum náðar sem Guð hefur úthlutað honum. Því skyldi enginn festa hugann við stærð keraldsins eða smæð. Hlutur sumra gæti komist fyrir í mannlófa, annarra gæti fyllt bikar og enn annarra heilt kerald.“¹⁵

1. Svaraðu eftirfarandi spurningum með hliðsjón af ofangreindri tilvitnun:
 - a. Hver er skylda hvers manns á þessum degi? _____

 - b. Hverjar eru þær blessanir sem þú hefur fengið frá Guði? _____

 - c. Hvað merkir orðið „kerald“ í þessari tilvitnun? _____

 - d. Hvers vegna ættum við ekki að festa hugann við „stærð eða smæð“ þeirrar hæfni sem okkur hefur verið gefin? _____

 - e. Nefndu eitthvað af því sem hindrar okkur í að höndla okkar skerf af náð Guðs. _

2. Hverjar af eftirfarandi fullyrðingum eru sannar?
____ „Stærð eða smæð“ hvað varðar hæfni okkar vísar til þess hversu klár við erum.
____ Til að þjóna Guði verðum við að gleyma veikleikum okkar og setja allt okkar traust á hann.
____ Ef við þróum ekki þá hæfni sem Guð gaf okkur í þessu lífi verða sálir okkar veikburða í hinu næsta.

11. KAFLI

Bahá'u'lláh segir:

„Þú hefur spurt Mig um eðli sálarinnar. Vita skalt þú í sannleika að sálin er tákni Guðs, himnesk gersemi; flestum lærdómsmannanna hefur ekki tekist að skilja veruleika hennar og enginn hugur, hversu skarpskyggn sem hann er, getur nokkru sinni vænst þess að afhjúpa leyndardóm hennar. Hún er fyrst alls sem skapað er til að kunngera ágæti skapara síns, fyrst til að þekkja dýrð Hans, fylgja staðfastlega sannleika Hans og krjúpa í lofgjörð frammi fyrir Honum.“¹⁶

1. Fylltu í eyðurnar í eftirfarandi setningum:
 - a. Sálín er _____ Guðs.
 - b. Sálín er _____ ; flestum lærdómsmannanna hefur ekki tekist að skilja _____ hennar og enginn hugur, hversu skarpskyggn sem hann er, getur nokkru sinni vænst þess að _____ hennar.
 - c. Sálín er _____ til að kunngera _____ .
 - d. Sálín er fyrst til að _____ dýrð Guðs.
 - e. Sálín er fyrst til að _____ sannleika Guðs.
 - f. Sálín er fyrst til að _____ í lofgjörð frammi fyrir Guði.

2. Hverjar af eftirfarandi fullyrðingum eru sannar?

_____ Að „afhjúpa“ leyndardóm þýðir að skilja hann.

_____ Mannsheilinn er það fyrsta sem þekkir og viðurkennir Guð.

_____ „Skarpskyggn“ þýðir skarpur.

_____ Lærdómsmaður skilur leyndardóm sálarinnar.

_____ Aðeins miklir heimspekingar geta skýrt frá mikilleika Guðs.

_____ Ekki er nauðsynlegt að hugsa um sálina því við getum aldrei skilið hana.

12. KAFLI

Bahá'u'lláh segir:

„Yður er farið líkt og fuglinum, sem svífur með fullum styrk máttugra vængja sinna gegnum ómælisdjúp himnanna í fullkominni og fagnaðarríkri vongleði, uns hann snýr aftur, knúinn af þörf til að seðja hungur sitt, til vatnsins og leirsins á jörðunni. Og er hann hefur fest sig í möskvum ástríðu sinnar, finnur hann sig vanmegnugan til að taka flugið á ný til ríkjanna, þaðan sem hann kom. Þennan fugl sem áður var íbúi himnanna, þrýtur afl til að hrista af sér byrðina, sem íþyngir flekkuðum vængjum hans, og neyðist til að leita sér dvalarstaðar í dustinu. Saurgið því ekki, ó þjónar Mínir, vængi yðar með leir vegvillu og fánýtra ástríðna og látið þá ekki flekkast af dusti öfundar og haturs, svo að yður megi ekki verða aftrað að svífa í himinsölum guðómlegrar þekkingar Minnar.“¹⁷

1. Ljúktu setningunum hér á eftir.
 - a. Fuglinn sem Bahá'u'lláh vísar til í þessari tilvitnun er _____ .
 - b. Þessi fugl er íbúi _____ .

- c. Ef vængir hans flekkast neyðist fuglinn til að leita sér _____
í _____ .
2. Svaraðu nú eftirfarandi spurningum:
- a. Hvernig geta „vængir“ sálarinnar „flekkast“? _____

- b. Hverjar eru þær byrðar sem íþyngja vængjum sálarinnar eins og „vatn og leir á jörðunni“? _____

- c. Hvað getur komið í veg fyrir að við svífum í himinsölum guðdómlegrar þekkingar? _____

- d. Hvers vegna skyldi sálin skipta á himnesku heimili sínu og dusti þessa heims? _____

3. Hverjar af eftirfarandi fullyrðingum eru sannar?
- _____ Veraldlegar langanir hindra andlegar framfarir okkar.
- _____ Vegvilla okkar og fánýtar ástríður aftra okkur frá að svífa í himinsölum guðdómlegrar þekkingar.
- _____ Öfund og hatur eru eðlileg mannleg einkenni og engin byrði fyrir sálina.
- _____ Við getum losað okkur við byrðina sem aftrar okkur frá að svífa gegnum ómælisdjúp himnanna með því að skiljast frá hlutum þessa heims.
- _____ Þessi heimur er heimili sálarinnar.

13. KAFLI

Bahá'u'lláh segir:

„Er Hann hafði skapað heiminn, og allt sem í honum lifir og hrærist, kaus Hann með beinum tilverknaði óhefts og allsráðandi vilja síns, að miðla mannum einstæðum auðkennum og hæfni til að þekkja Hann og elska. Á þá hæfni verður að líta sem hina skapandi hvöt að baki öllu sköpunarverkinu og grundvallarmarkmið þess.... Yfir innsta veruleika sérhvers skapaðs hlutar úthellti Hann ljósi eins af nöfnum sínum og gerði hann að viðtakanda dýrðar einnar eigindar sinnar. En í veruleika mannsins safnaði Hann saman geisladyrð

allra nafna sinna og eiginda og gerði hann að spegli síns eigin sjálfs. Af öllu sem skapað er hefur aðeins manninum verið veitt svo dýrmæt gjöf, svo óförgengileg hylli.“¹⁸

1. Fylltu í eyðurnar hér á eftir.

- a. Guð kaus að miðla manninum einstæðum auðkennum og hæfni til að _____
_____.
- b. Yfir innsta veruleika _____ skapaðs hlutar úthelldi Hann ljósi _____
_____ og gerði hann að viðtakanda dýrðar _____
_____.
- c. Í veruleika mannsins safnaði Hann saman geisladyrð _____
_____ og gerði hann að spegli _____.

2. Svaraðu nú þessum spurningum:

- a. Getur þú nefnt nokkrar af eigindum Guðs? _____

- b. Hvaða eigindir Guðs getur mannssálin endurspeglað? _____

- c. Hvernig er hægt að birta þessar eigindir? _____

- d. Hver er sú sérstaka hylli sem manninum hefur verið veitt? _____

3. Hverjar af eftirfarandi setningum eru sannar?

- _____ Maðurinn er ekkert frábrugðinn öðru sem skapað er.
- _____ Hæfileikinn til að þekkja Guð og elska hann er megintilgangur sköpunarverksins.
- _____ Sérhver skapaður hlutur birtir eina eigind Guðs.
- _____ Mannssálin getur endurspeglað allar eigindir Guðs.

14. KAFLI

Bahá'u'lláh segir okkur:

„Þessir kraftar sem sól guðlegrar hylli og uppspretta himneskrar leiðsagnar hefur gætt veruleika mannsins eru þó duldir í eðli hans, eins og loginn í kertinu og ljósið í lampanum. Veraldlegar ástríður geta myrkvað ljóma þessara krafta líkt og rykið og sorinn á speglinum getur hulið ljós sólarinnar. Það kviknar ekki sjálfkrafa á kertinu eða lampanum og spegillinn getur aldrei hreinsað sjálfan sig af soranum. Þess vegna er auðsætt að lampinn mun ekki lýsa fyrr en eldur hefur verið kveiktur og ef spegillinn er ekki fægður getur hann aldrei birt ímynd sólarinnar né endurspeglað ljós hennar og dýrð.“¹⁹

1. Hvað þýðir orðið „dulinn“? _____

2. Hvaða kraftar dyljast í sál mannsins? _____

3. Yfir hvaða möguleikum býr lampinn? _____
4. Yfir hvaða möguleikum býr spegillinn? _____
5. Hvað þarf að gera til þess að lampinn lýsi? _____

6. Hvað þarf að gera til þess að spegillinn endurspegli ljós? _____

7. Geta lampinn og spegillinn birt möguleikana sem í þeim býr af eigin rammleik? _____
8. Hvernig getum við tengt þessi tvö dæmi ástandi mannssálarinnar? _____

9. Hver getur fengið mannssálina til að birta möguleikana sem í henni býr? _____

15. KAFLI

Bahá'u'lláh segir:

„Dyrnar að þekkingu á Hinum aldna hafa ætíð verið og verða ætíð luktar sjónum manna. Mannlegur skilningur mun aldrei fá aðgang að heilagri hirð Hans. Sem tákn um miskunn sína og staðfestingu á gæsku sinni hefur Hann opinberað mönnum sólir himneskrar leiðsagnar sinnar, tákn guðdómlegrar einingar sinnar, og fyrirskipað að þekking á þessum helguðu verum jafngildi þekkingu á Hans eigin sjálfi. Hver sem þekkir þá hefur þekkt Guð. Hver sem hlýðir á kall þeirra hefur hlýtt á rödd Guðs og hver sem vitnar um sannleika opinberunar þeirra hefur vitnað um sannleika Guðs sjálfs. Hver sem snýr við þeim baki hefur snúið baki við Guði og hver sem ekki trúir á þá hefur ekki trúað á Guð. Sérhver þeirra er vegur Guðs, sem tengir þessa veröld ríkjunum hið efra, og gunnfáni sannleika Hans sem blaktir yfir öllum í ríkjum jarðar og himins. Þeir eru opinberendur Guðs meðal manna, vitnisburður um sannleika Hans og tákn dýrðar Hans.“²⁰

1. Svaraðu eftirfarandi spurningum með ofangreint í huga:
 - a. Getum við fengið beina og milliliðalaus þekkingu á Guði? _____
 - b. Hvernig getum við þá þekkt Guð? _____

 - c. Getum við nefnt nokkrar sólir himneskrar leiðsagnar? _____

 - d. Hvaða rödd hafa þeir heyrt sem hlusta á opinberendur Guðs? _____

 - e. Við hverjum snúum við baki ef við virðum ákall opinberenda Guðs að vettugi? _____

2. Ljúktu við eftirfarandi setningar:
 - a. Dyrnar að þekkingu á Hinum aldna hafa ætíð verið og verða ætíð _____
_____.
 - b. Mannlegur skilningur mun aldrei fá aðgang að _____.
 - c. Guð hefur sent opinberendur sína sem tákn um _____ sína og staðfestingu á _____ sinni.
 - d. Þekking á opinberendum Guðs jafngildir _____
_____.
 - e. Hver sem þekkt hefur þá hefur _____.
 - f. Hver sem hlýðir á kall þeirra hefur _____.

g. Sérhver þeirra er vegur Guðs sem _____

3. Hverjar af eftirfarandi fullyrðingum eru sannar?

- _____ Við getum vaxið andlega af eigin rammleik.
- _____ Guð hefur gefið okkur hugsun og það nægir til þess að við getum tekið framförum.
- _____ Við vöxum andlega með því að viðurkenna opinberanda Guðs og þurfum ekki að gera neitt meira.
- _____ Við getum vaxið andlega með því að viðurkenna opinberanda Guðs og reyna að lifa samkvæmt kenningum hans.
- _____ Við getum þekkt Guð milliliðalaust.
- _____ Maðurinn getur orðið eins og Guð.
- _____ Guð er hafinn yfir mannlegan skilning.
- _____ Að hlusta á orð opinberanda Guðs jafngildir því að hlusta á rödd Guðs.

16. KAFLI

Bahá'u'lláh segir:

„Spámenn og boðberar Guðs hafa verið sendir niður í þeim tilgangi einum að leiða mannkynið á hinn beina veg sannleikans. Tilgangurinn með opinberun þeirra er sá að uppfærða alla menn, svo að þeir megi á dauðastundinni stíga upp í fullkomnum hreinleika og heilagleika og í algjörri andlegri lausn, til hásetis Hins hæsta.“²¹

Og á öðrum stað segir hann:

„Maðurinn er hinn æðsti verndargripur. Skortur á réttri uppfærðslu hefur hins vegar svipt hann því sem býr í eðli hans. Fyrir orð sem fram gekk af munni Guðs var hann skapaður; með einu orði til viðbótar var hann leiddur að Uppsprettu fræðslu sinnar; með enn einu orði var skjaldborg slegin um stöðu hans og forlög. Hin mikla verund segir: Lítið á manninn sem námu fulla af ómetanlegum gimsteinum. Aðeins uppfærðsla getur fengið hana til að opinbera fjársjóði sína og gert mannkyni kleift að njóta góðs af þeim. Ef nokkur maður hugleiddi það sem helgiritin, sem send eru niður frá himni heilags vilja Guðs, hafa opinberað, viðurkenndi hann fúslega að markmið þeirra er að mennirnir skuli metnir sem ein sál svo að sérhvert hjarta megi verða innsiglað með orðunum „Ríkið mun heyra Guði“ og ljós guðlegrar hylli, náðar og miskunnar megi umlykja allt mannkynið.“²²

1. Í hvaða tilgangi voru spámenn og boðberar Guðs sendir niður? _____

2. Hver er tilgangurinn með opinberun þeirra? _____

3. Hvað þýðir orðið „verndargripur“? _____

4. Hver er afleiðingin af skorti á réttri uppfræðslu? _____

5. Hverju getur rétt uppfræðsla komið til leiðar? _____

6. Hvaðan fáum við uppfræðslu okkar? _____
7. Hver eru forlög okkar? _____

8. Hverjir eru nokkrir þeirra gimsteina sem uppfræðsla leiðir í ljós? _____

9. Hvað viðurkennum við fúslega þegar við hugleiðum helgiritin? _____

17. KAFLI

Bahá'u'lláh segir:

„Þú hefur einnig spurt Mig um ástand sálarinnar eftir viðskilnaðinn við líkamann. Vit í sannleika að ef sál mannsins hefur gengið á vegum Guðs mun hún vissulega hverfa aftur til dýrðar Ástvinarins. Ég sver við réttlæti Guðs! Slík verður

tignarstaða hennar að ekki nokkur penni getur lýst því né tunga fært í orð. Sú sál sem hefur verið trú málstað Guðs og staðið óbifanleg á vegi Hans mun eftir andlátið verða gædd slíkum mætti að allar veraldirnar sem Hinn almáttugi hefur skapað geta hagnast fyrir hennar tilstyrk.“²³

1. Ljúktu við eftirfarandi setningar:
 - a. Ef sál mannsins hefur gengið á vegum Guðs mun hún vissulega _____.
 - b. Slík verður tignarstaða hennar að _____.
 - c. Sú _____ sem hefur verið _____ og _____ óbifanleg á _____ mun eftir _____ verða gædd slíkum _____ að allar veraldirnar sem Hinn _____ hefur _____ geta _____ fyrir hennar tilstyrk.

18. KAFLI

Bahá'u'lláh segir okkur:

„Blessuð er sú sál, sem á stundu viðskilnaðar síns við líkamann, er helguð frá fánýtum hugarórum þjóða heimsins. Slík sál lifir og hrærist í samræmi við vilja skapara síns og gengur inn í hina alhæstu paradís. Meyjar himinsins, íbúar hinna upphöfnustu hóbýla, munu hringsóla um hana og spámenn Guðs og Hans útvöldu munu leita félagsskapar hennar. Sú sál mun ræða við þá hindrunarlaust og skýra þeim frá því, sem hún var látin þola á vegi Guðs, Drottins allra veraldanna.“²⁴

„Hann ætti að fyrirgefa hinum syndugu og fyrirlíta aldrei lága stöðu þeirra, því að enginn þekkir sín eigin endalok. Hversu oft hefur syndarinn á dauðastundinni náð taki á kjarna trúarinnar og drukkið af hinum ódauðlega drykk og tekið flugið til herskaranna á hæðum! Og hversu oft hefur ekki dyggur átrúandi á stundu uppstigningar sálar sinnar, ummyndast svo að hann hefur fallið niður í hinn neðsta eld!“²⁵

1. Í hvaða ástandi ætti sál okkar að vera þegar hún skilst frá líkamanum? _____
2. Nefndu dæmi um nokkra fánýta hugaróra. _____

3. Hvert er ástand þeirrar sálar eftir dauðann sem er helguð frá fánýtum hugarórum? ____

4. Hverjir eru félagar slíkrar sálar? _____

5. Mun slík sál geta rætt við spámenn Guðs og hans útvöldu? _____
6. Vitum við fyrir fram hvenær og hvernig jarðnesku lífi okkar lýkur? _____
7. Hvað getum við gert núna til að öðlast það eilífa líf sem okkur er ætlað? _____

19. KAFLI

‘Abdu’l-Bahá útskýrir:

„Líkt og andi mannsins lifir að eilífu eftir að hann varpar af sér þessum efnislega ham getur hann án efa, eins og allt annað í tilverunni, þroskast og tekið framförum. Þess vegna getum við beðið fyrir því að sálir framliðinna þróist, hljóti fyrirgefningu og þiggi gjafir Guðs, hylli Hans og náð. Því er í bænum Bahá’u’lláh beðið um fyrirgefningu Guðs og miskunn Hans með þeim sem horfið hafa til næsta heims. Líkt og mennirnir hafa þörf fyrir Guð í þessum heimi, þarfnast þeir Hans einnig í hinum næsta. Mennirnir eru alltaf þurfandi og Guð er fullkomlega óháður þeim, bæði í þessum heimi og þeim sem kemur.“²⁶

Hvers vegna ættum við að biðja fyrir sálum framliðinna?

20. KAFLI

‘Abdu’l-Bahá skrifar:

„Þegar sál mannsins hefur sig yfir þessa hverfulu öskustó og rís upp til ríkis Guðs falla af henni blæjurnar, sannleikurinn opinberast, allt sem áður var óþekkt verður skýrt og augljóst og dulin sannindi afhjúpast.

Hugleiðum að í heimi móðurlífsins var maðurinn blindur, heyrnarlaus og mállaus, rúinn allri ytri skynjun. En þegar hann kom út úr þeim dimma heimi inn í veröld ljóssins, sáu augu hans, eyru hans heyrðu og tunga hans talaði. Það sama gerist þegar hann hverfur frá þessari dauðlegu veröld til ríkis Guðs. Þá fæðist hann í anda, augu skynjunar opnast, eyru sálarinnar heyra og öll sannindin sem áður voru honum ókunn verða skýr og augljós.“²⁷

1. Fylltu í eyðurnar hér á eftir.

a. Þegar sál mannsins yfirgefur þennan heim þá

- _____ blæjurnar,
- sannleikurinn _____,
- allt sem áður var óþekkt _____
- og dulin sannindi _____.

b. Í heimi _____ var maðurinn _____, _____
og _____.

c. Þegar við fæddumst í þessa veröld, _____ augu okkar, eyru okkar
_____ og tunga okkar _____.

d. Það sama gerist þegar við komum til ríkis Guðs. Við munum _____ í
_____.

e. Þá munu augu _____, eyru _____
og öll _____ sem áður voru okkur ókunn verða _____
og _____.

2. Hverjar af eftirfarandi fullyrðingum eru sannar?

- _____ Í heimi móðurlífsins vitum við hvað bíður okkar.
- _____ Ástand okkar eftir dauðann er okkur dulið í þessu lífi.
- _____ Eftir dauðann opnast okkur algjörlega ný tilverusíð.
- _____ Þegar við deyjum endurfæðumst við í þennan heim.

21. KAFLI

Bahá'u'lláh segir:

„Víkjum nú að spurningu þinni um hvort sálir mannanna haldi áfram að vera meðvitaðar um hver aðra eftir viðskilnað sinn við líkamann. Vita skalt þú, að sálir fylgjenda Bahá, sem gengið hafa inn og fengið staðfestu í hinni fagurrauðu örku, munu bindast böndum og hafa náin samskipti hver við aðra og verða svo nátengdar í lífi sínu, eftirsókn, áformum og athöfnum, að þær verða eins og ein sál. Þetta eru að sönnu þeir, sem eru vel upplýstir, skarpskyggir og gæddir skilningi. Þetta er fastráðið af Honum, sem er hinn alvitri og alvísi.

Fylgjendum Bahá, sem eru íbúar arkar Guðs, er hverjum og einum vel kunnugt um ástand og ásigkomulag hvers annars og þeir eru tengdir böndum innilegrar vináttu og samlyndis. Slíkt ástand hlýtur samt sem áður að vera háð trú þeirra og hegðun. Þeir sem eru sama stigs og sömu stöðu, eru sér fyllilega meðvitandi um hæfni hvers annars, lyndiseinkunn, afrek og verðleika. Þeim sem eru á lægra stigi er þó fyrirmunað að skilja til fulls eða meta verðleika þeirra, sem eru þeim ofar. Sérhver fær sinn skerf frá Drottni sínum. Sæll er sá sem beint hefur augliti sínu að Guði og verið staðfastur í ást Hans uns sál hans tekur flugið til Guðs, allsráðandi Drottins, hins máttugasta, þess sem ætíð fyrirgefur, hins almiskunnsama.“²⁸

1. Munum við bera kennsl á fólk sem við höfum þekkt hér í næsta heimi? _____
2. Hversu náíð verður samband sálnanna í næsta heimi? _____

3. Í hverju liggur greinarmunur og auðkenni sálnanna í næsta heimi? _____

4. Fer einhver á mis við miskunn Guðs? _____

22. KAFLI

Bahá'u'lláh hvetur okkur með svofelldum orðum:

„Ó þjónar Mínir! Hryggist eigi, ef á þessum dögum og á þessu jarðneska sviði hafi hlutir, er ganga í gegn óskum yðar, verið ákvarðaðir og birtir af Guði, því að dagar sæluríks fagnaðar, himnesks unaðar, bíða yðar vissulega. Veraldir, sem eru heilagar og andlega dýrlegar, munu verða birtar augum yðar. Yður er fyrirhugað af Honum, í þessum heimi og þeim sem kemur, að öðlast hlutdeild í gæðum þeirra og taka þátt í fögnuði þeirra og fá skerf af endurnærandi náð þeirra. Til allra þeirra munuð þér án efa komast.“²⁹

1. Hverjar af eftirfarandi fullyrðingum eru sannar?

_____ Við ættum að hryggjast þegar hlutirnir ganga ekki eins og við viljum.

_____ Allt er ákvarðað af Guði, hvort sem það er gott eða slæmt.

_____ Dagar sæluríks fagnaðar bíða okkar allra.

_____ Við munum sjá veraldir sem eru heilagar og andlega dýrlegar.

_____ Okkur er fyrirhugað að fá hlutdeild í gæðum veralda sem eru heilagar og andlega dýrlegar, bæði í þessu lífi og því sem kemur.

2. Hvers vegna ættum við ekki að hryggjast þegar hlutir gerast sem fara gegn óskum okkar? _____

3. Hvaða fyrirheit gefur Bahá'u'lláh okkur í þessari helgigrein? _____

23. KAFLI

Í þessum bókarhluta höfum við velt fyrir okkur merkingu mannlífsins. Við höfum lært mikið um eðli sálarinnar, tilgang lífsins í þessum heimi, nauðsyn þess að þróa andlega eiginleika og fyrirheitið sem okkur er gefið um eilíft líf, dýrlegt og gleðiríkt. Í öðrum hluta bókarinnar töluðum við um tvíþættan tilgang – að sinna andlegum og vitsmunalegum vexti okkar og stuðla að umbreytingu þjóðfélagsins. Hér gefst tækifæri til að fjalla meira um þetta viðfangsefni og hugleiða mikilvægi þess að sinna báðum þáttum þessa tilgangs í ljósi þeirrar sýnar sem við höfum fengið á þróun og þroska sálarinnar. Þegar þessi mál eru reifuð og hugleidd gætu umræður um þemun hér á eftir komið að gagni í hópnum þínum.

1. *Að þróa andlega eiginleika*

2. *Að hlýða lögum Guðs*

3. *Að leggja af mörkum til velferðar mannkynsins*

4. *Að taka framförum á braut þjónustu*

TILVÍSANIR

1. Úr ávarpi sem var flutt 10. nóvember 1911, birt í *Paris Talks: Addresses Given by 'Abdu'l-Bahá in 1911* (Wilmette: Bahá'í Publishing, 2006, 2016 printing), nr. 29.12–13, bls. 109.
2. Úr bréfi dagsettu 1. apríl 1946. Skrifað fyrir hönd Shoghi Effendi, birt í *Lights of Guidance: A Bahá'í Reference File* (New Delhi: Bahá'í Publishing Trust, 1988, 2010 printing), nr. 1820, bls. 537.
3. Úr bréfi dagsettu 28. júlí 2016. Skrifað fyrir hönd Allsherjarhúss réttvísinnar.
4. 'Abdu'l-Bahá, í *Some Answered Questions* [Nokkrum spurningum svarað] (Wilmette: Bahá'í Publishing, 2014, 2016 printing), nr. 66.3, bls. 352–53.
5. Sama rit, nr. 38.5, bls. 220.
6. Úr ávarpi sem 'Abdu'l-Bahá flutti 9. nóvember 1911, birt í *Paris Talks*, nr. 28.16, bls. 104.
7. Úr bréfi dagsettu 31 desember 1937. Skrifað fyrir hönd Shoghi Effendi, birt í *Lights of Guidance*, nr. 680, bls. 204.
8. *Úrval úr ritum Bahá'u'lláh*, LXXXII, efnisgr. 8.
9. 'Abdu'l-Bahá, í *Some Answered Questions* [Nokkrum spurningum svarað], nr. 61.1–2, bls. 334.
10. *Úrval úr ritum Bahá'u'lláh*, LXXX, efnisgr. 2.
11. Sama rit, LXXXI, efnisgr. 1.
12. Sama rit, CLXV, efnisgr. 1–3.
13. Bahá'u'lláh, *Hulín orð*, arabíska nr. 32.
14. From a talk given on 6 July 1912, birt í *The Promulgation of Universal Peace: Talks Delivered by 'Abdu'l-Bahá during His Visit to the United States and Canada in 1912* (Wilmette: Bahá'í Publishing, 2012), bls. 315–16. (authorized translation)
15. *Úrval úr ritum Bahá'u'lláh*, V, efnisgr. 4.
16. Sama rit, LXXXII, efnisgr. 1.
17. Sama rit, CLIII, efnisgr. 6.
18. Sama rit, XXVII, efnisgr. 2.
19. Sama rit, XXVII, efnisgr. 3.
20. Sama rit, XXI, efnisgr. 1.

21. Sama rit, LXXXI, efnisgr. 1.
22. Sama rit, CXXII, efnisgr. 1.
23. Sama rit, LXXXII, efnisgr. 7.
24. Sama rit, LXXXI, efnisgr. 1.
25. Sama rit, CXXV, efnisgr. 3.
26. ‘Abdu’l-Bahá, í *Some Answered Questions* [Nokkrum spurningum svarað], nr. 62.3, bls. 340–41.
27. *Selections from the Writings of ‘Abdu’l-Bahá* (Wilmette: Bahá’í Publishing, 2010, 2015 printing), nr. 149.3–4, bls. 246–47.
28. *Úrval úr ritum Bahá’u’lláh*, LXXXVI, efnisgr. 1–2.
29. Sama rit, CLIII, efnisgr. 9.